

**IIRAI RUILLAI DO IITIFUIAI JINO
 CIOTAINA
 Juziñamui San Juaamo Jino
 Cíotagafue
 EL APOCALIPSIS
 O Revelación a San Juan**

Jesucristo jino onóitagafue

¹ Bifue uire íitífuiái jino cíotainafue. Juziñamui bífuiaina Jesucristomo cíotate, afémie ie ocuífireganomo ácatallena. Daií Cristo uáfue na raire ífícaítífue na jino íaióimo ácatate. Jesucristo ie ángel daína abi ímiedo bie jino cíotagana ie ocuífiregamie Juaamo onótate.

² Afe Juan nana ie ciónana uáfue na jino llote. Daje izói afémie Juziñamui lloga uaina nabáífirede. Afe Juziñamui lloga uai Jesucristodo ñue jaícina llócaiga.

³ Bie Juziñamuimona oga uaina jíáimacimo facáduana cacáдино caimare itíaiói. Daje izói bie rabénicomo cuega uaina cacáillano ñue náfuetino caimare ióbitaiói. Mei bie rabénicomo llogáfuiái zúítirui ja áinozideza.

Siete dígade iglésiai daína Juziñamuimo gáirifiredinomo Juan cuete

⁴ Asia éniemo ite siete dígade iglésiai daína Juziñamuimo gáirifiredinomo cueticue. Cue Juáadicue. Mai Juziñamui ñúefuiái dibénemo, naa ie caimare uái illafue dibénemo omoi iri. Mei afe

Juzíñamui birui itímieza, íemo jaca nanómona jaiái itímieza, íemo uire jaca ninomo íitimieza. Daje izói ie ráirano uícomo siete dígade ñuera jóriái ite. Afe jóriái Juzíñamui Ñuera Joreño jana. Afémie ñúefue dibénemo omoí iri.

⁵ Iemo daje izói Jesucristo lloga ñúefuiai jeire omoí oíri. Afémie jáífo méidofínide uai nabáiraíma. Daje izói afémie nano tíllanomoná abido meine tíñellena cáatagamie. Iemo jáí afémiemo bínie illáicomini ocuilla ríino ite. Afe Cristo caina izíruillano ie totaca díedo cai fiénidifuiaina oni dote.

⁶ Iemo nane illáicomínina caina itátate ie Moo Juzíñamuimo cai jaináillena. Daje izói comínido Juzíñamuimo úrifiredinona caina jóonete. Afe Juzíñamui íena jóonegacái. Ie jira jaca ninomo áillue ébifue naa ocuilla ríino díga afémie íena íteza. Aquíe izóideza.

⁷ ¡Ero, Cristo mona uílliedo bite! Nana comíni íena cíoitiaíoi. Daje izói ie fatino íena cíoitiaíoi. Iemo nana bínie nairaí afémie bíllana cíoillano éenaitiaíoi. Jí, uafue daítadeza.

⁸ Cai jamánomo ríire Ocuídime bie izói daide: “Nana ráfuiái nai cómuiñenia uícodo itímiedicue. Daje izói fuizájillanomo itímiedicue. Abecedario A-do táinia izói nánoramiedicue. Daje izói abecedario Z-mo fuizailla izói íiraímiedicue,” daide. Afémie birui itímie, íemo jaca nanómona itímie, íemo uire jaca ninomo íitimieza.

Ebírede Cristo nicáirilla izói ciona

⁹ Omoí ama Juáadicue. Omoí duere zefuilla izói daane duere zefuídicue. Daa omoí izói Juzíñamui

illáimana illánomo jaináidicue. Iemo Jesucristo omoi úiñotaja izói daa omoi diga úiñotagacue. Jesucristodo fairíotaga Juzíñamui ñuera uai jino cue llócailla jira llavécacue. Pátmosmo mámeçirede monaillai cigi ídumo llavécamiedicue.

¹⁰ Iemo afénomo cai Ocuíraima cai ocózinaitaruimo Juzíñamui Ñuera Joreño náamatagacue. Afe llezica vudugoi fúunua izoide ficírede uaina cue méifomo cacádicue.

¹¹ Afe uai cuena daide:

—Naga ráfuiái uícodo itímiedicue. Daje izói fuizájillanomo itímiedicue. Abecedario A-do taineca, íemo Z-mo fuilla izóidimiedicue. Mai nana o ciona diga daa rabénicomo cúeiri. Cuiano, Asia éniemo ite siete dígade iglésiai daina Juzíñamuimo garífiredinomo o oreri. Afe jófueniaí mámeçiaí: Éfeso, íemo Esmirna, íemo Pérgamo, íemo Tiatira, íemo Sardis, íemo Filadelfia, íemo Laodicea, — daide.

¹² Bu cuemo úrilla daiíllena abido gírecaidicue. Gírecaillano, siete dígade oro finoína mechérana ciódicue.

¹³ Afe cigimo cómemona comuídimiena eróidena ciódicue. Afémie jitáoi garoi éiba ícoimo dúcide. Ie jogóbemo lláidife oro finoína.

¹⁴ Afémie ifótirai iere úzerede, jaillici úzerena izói úzerede. Iemo jáiá nieve izói úzerede. Ie ui irai bóua izói cíoide.

¹⁵ Afémie éiba ñue queníretaga bronce izói quenírede. Ua bronce iraimo ruílla llezica jamánomo quenírena izói, ie idaí quenírede. Iemo aillo imánillai nofico tua ficírena izói ie uai ficírede.

16 Afémie onoi nabézimo siete dıga ucudu llıide. Ie fuémona iere jáirede llojéfaı izoide raa jino billa; afefai nágafene jáirede. Ie uiéco jitoma iere riire egáiñua izói riire egáiñote.

17 Afémiena cíollano, ie anamo tíidimie izói baıdıcue. Mei íadı afémie ie nabezi cuemo bıtano cuena daıde:

—Jacıruiñeno o iri. Cue bie nanóidimiedıcue; dáamiedıcue fuızájillanomo íitimiedıcue.

18 Birui cáadimiedıcue. Mei nauı tíidıcue, mei íadı birui jaca ninomo cáaitıcue. Tıilla zuitara llave izoide raa cuemo ite; daje izói tíidıno illano llávenıaı cuemo ite.

19 O cıona dıga mai cúeiri; birui itıfuiıaı cúeiri, íemo uıre cómutıfuiıaı cúeiri.

20 Cue nabézimo o cıona siete dígade ucúduıaı rafue nauı báınino ite. Ja birui jino uáfodo llórede; daje izói siete dígade mechera rafue llórede. Afe siete dígade ucúduıaı siete dígaze Juzıñamuımo gairıdıno uai llócaıtino jana. Iemo afe siete dígade mechera siete dígaze Juzıñamuımo gairıfıredıno jana, —daıı afémie cuena daıde.

2

Siete dígade ıglésıaı daına Juzıñamuımo gairıfıredıno lollıuıaı: Efésomo ite ínotınomo llogáuıaı

¹ Cue cíonamie dáanomo cuena daıde:

Efésomo ite Juzıñamuımo gairıdıno úıñoraimamo bıuıaı cúeiri: “Afe nabézido siete dígade ucúduıaı llııidimie daje izói siete dígade oro finoina mechera

cígido macáfiredo. (Afémie mechera cígido mácafirena izói, comini ñue úiñolle jana.) Afémie afe úiñoraimana bie izói daide:

² Nana o finócafuiaina onódicue. O riédemo táijidioza onódicue, naa o comeci járitaiñedeza. Daje izói fiénidino fieni illáfuiaina iere izire o rairuállana onódicue. Iemo jái táinona “Jesucristo orécanodicaí” daidínona facátatíoza onódicue. Afemona afémaci taino llúana baitíoza.

³ Jaca o comeci járidoñedio, íemo iere cuedo o táijina llezica cue ícoinia iere duere zefuídioza. Afe llezica zefuiruiñeno ñue táijidio.

⁴ Mei íadi daa figóñedifuenta omo ite. Nano fueñe cue o izíruilla izói birui cuena izíruíñedio.

⁵ Ie jira ninómona oni nibéfodo baídioza comeci uibi. Mai omo itífue méidori. Fueñe o illa izói o iri. Bífuenta o méidoñenia omo raire bíiticue, omo ite egáiñote raa oni óllena.

⁶ Mei jáífodo, daa ñúefuenta nai omo ite. Afe nicolaitas fieni finócafuiaimo naa íaioi fieni jáífodo llógamo éoicana eróidio. Cue daje izói áfena éoidicue.

⁷ Ñuera Joreño Juzíñamuimo jaináidinona dáinamo cacáacadimie áfemo cacai. Afe Ñuera Joreño bie izói daiíacade: “Fiénidena anáfenodinona jáidimacina Juzíñamui nífueninanomo ite cáatate amena llizíllana güitátaiticue,” daide.

Esmírnamo ite úiñotínomo llogáuai

⁸ Daje izói Esmírnamo ite Juzíñamuimo garírdino úiñoraímamo búuai cúeiri: “Nanódimie dáamie íiraimiena ómoimo úrite. Naui bíniemo tíidimie, íemo meine abido nane cáadimiena jaide. Afémie ona daide:

9 Nana o finócana onódicue. Daje izói o duere zefuállana onódicue, naa o ráanina diga. Mei íadi uáfueza Cristo dibénedo iere ráaredio. Jíaimaci fieni omo úrillana onódicue. Afémaci, “Juzíñamui nizeca Judíodicai” daidíaioi, mei íadi íeñediaíoi. Afémaci daní Taife dibénemo jaináidino.

10 Duere o zefuállamo jacínaiñeno o iri. Mei ómoimona dámierie Taife llavéracomo llavétaiteza, nana omoi facátallena. Daíí omoi comeci ifue onóillena facátallio moiza. Diez dígarui duere zefúredio moi. Mei íadi o tíillinomo zóofeñeno íinofireiri. Daíí o íadi zíñona cáallena o jirídotaiticue.

11 Ñuera Joreño Juzíñamuimo jaináidinona dáinamo cacáacadimie mai áfemo cacai. Afe Ñuera Joreño bie izói daííacade: “Fíénidena anáfenodinona jáidimaci nane méifodo tíillamo raamo jíríñeitiaíoi,” daide.

Pérgamomo ite íinotínomo llogáuai

12 Daje izói Pérgamomo ite Juzíñamuimo jaináidino úíñoraimamo bíuai cúeiri: “Afe nágafene jáirede lloefai llíidimie bie izói ona daide:

13 Nana o finócana onódicue. Afe izói Taife ocuícano cígimo itíioza onódicue. Afénomo itíio íadi zóofeñeno cuemo ñue o ínuana onódicue. Daje izói cuemo o ínuana fáicanocaiñedio. Afe izói Antipas mámeciredimie cue ñue jáicina cue uai nabáíiredimie. Afémie omoi cígiri fatíaioi. Ie fáinaruido, cuemo omoi ínuana zóofeñedio moi, Taife illánomo itíio moi íadi.

14 Mei íadi cue lletárafuiaina ómoimo ite. Omoimona dáarie jadí Pérgamomo Balaam llófuiana fáicanocaiacañediaioi. Afe Balaam jaiiai Balacna llófuate Israel comini fienu finuaillena. Afe Balac Balaam llófuiamona Israel cominina jánaraimo fecaca rílleniaina ritátate. Afe dáaruído afémacina iere jiruítetade.

15 Nane jáie cue lletárafuena ómoimo ite. Omoí cígimo dáarie afe nicolaítas lloga uaina féitaiacañedino ite. Afémacina éoidicue.

16 Ie jira mai omoí comeci ifue méidori; mei íadi omoí méidoñenia, raire omoí diga fuirízaibitícue. Uáfueza cue fuémona bite jáirede lloéfaido omoí fienu finódinona fáziaibitícue.

17 Ñuera Joreño Juzíñamuimo jaináidinona dáinamo cacáacadimie, áfemo cacai. Afe Ñuera Joreño bie izói daiíacade, “Fiénidena anáfenodimiena jáitimie afe báinino ite maná daína monámona cocide güíllena güitátaitícue. (Bie maná Juzíñamui íaioi comécina náiretaillena jana.) Iemo afémiemo úzerede nofitofena fécaítícue. Afe nofitofemo buna ónoñega comue mámecei cuelle. Dama afe nofitofe llíinoitímie áfena onuille.” Aquíe izói daide.

Tiatíramo ite ñnotinomo llogáuai

18 Daje izói Tiatíramo ite Juzíñamuimo jaináidino úiñoraimamo bíuai cúeiri. “Juzíñamui Jitó ómoimo úrite. Afémie ui irai bóua izoide, íemo ie éiba ñue queníretaga bronze izói quenírede. Afémie bie izói ómoína daide.

19 Nana omoí finócana onódicue. Cuena omoí izíruillana onódicue, naa cuemo omoí ñnua diga.

Daje izói cue dibénedo ñue omoi táijicaillana onódicue, naa omoi comeci járitaiñena diga. Fueñe omoi táinia baimo birui jamánomo finócaidi omoi.

²⁰ Mei íadi ómoimo daa cue lletárafuena nai ite. Afe Jezabel mámeciredingo llógana rairuíñedi omoi. Afengo, “Juzíñamui dibénedo úriticue,” daífirede, mei íadi fieni ie llócaigafuedo cue ocuífireganona jífuete. Afe jífuia uaido íai oina iere jiruítetade. Daje izói jánaraimo fecaca rílleniaina íai oina ritátate áfemo caimátaillena.

²¹ Aféngomo are úiñoidicue afengo comeci ifue méidollena. Mei íadi afengo áfena méidoacañede. Afengo ie jiruífueina fáicanocaiacañede.

²² Mei jira birui afémaci afengo finócafuena fáicanocaiñenia, aféngona iere izire iráretaiticue. Daje llezica nana afengo diga jiruíredinona duere zefuítaiticue.

²³ Afengo úruiaina títaiticue. (Afe úruiai daina afengo llógamo jíéruitino.) Afemona naga come ifoci úrillana, ie comeci ifue diga ñue ícoimo cue onónana, nana Juzíñamuimo gairídino fídiitiaioi. Iemo ómoimona illa dígamie fieni omoi fínuaze ómoina duere finoiticue.

²⁴ Mei íadi ómoimona Tiatíramo ite jíáimaci afe Jezabel omoi llófua fiénide uaina náfueñedi omoi. Afe Jezabélmo jaináidino íai oí llófueinana daidíaioi, “Cai llófueina uai Taife ie, iere báinide nai uáfodo ónonidífuiai,” daidíaioi. Afe llófueinana onótañegaomoi. Iemo ómoimo ite nauí cue lloga baimo jíáiena ómoina ócuiñeiticue.

²⁵ Daa bie llóiticue: Omoimo ite ñúefuiai ñue rairuiri, nai cue bíñeille dino.

26 Fiénidena anáfenodinona jáitnona náirai ai ócuitimacina jóneiticue. Afémaci cue jítainana ñue ícoimo fuitáдино. Ocuille ríino íaioimo jóneiticue,

27 mei daií cue Moo cue ocuille ríinona cuemo jóneteza. Iemona náiraiaina rírede lloébici izóidedo ríire ócuitiaioi. Íaioimo cacáreacañedinona ícírui lláia jéenino llairúngotailla izói, afe izói íaioina duere fínoitiaioi.

28 Daje izói monáiracudu iere ebire egáñua izói, afémaçina ebire fínoiticue.

29 Ñuera Joreño Juzíñamuimo jaináidinona dáinamo cacáacadimie mai áfemo cacai.” Aquie izói daide.

3

Sárdismo ite ínotinomo llogáuai

1 Daje izói Sárdismo ite Juzíñamuimo jaináidino úiñoraimamo bíuai cúeiri: “Afe siete dígade Juzíñamui jóriaredimie, ñi afe Juzíñamui Ñuera Joréñoredimie Cristo, íemo afe siete dígade ucúduai llíidimie dáamie. Afémie bie izói ona daide: Nana o finócana onódicue. Crístomo o jainaina izóinado jica jalleide, íadi onódicueza tíidimie izói itio.

2 Come cazilla izói mai abina onoiri. Nai omo due jiza fiébide ínogafuiaina meine ríire finori, mei aféfuiai jae táinocaiacadeza. Eróidicuemo o finócafuiai cue Juzíñamui eróicana ñue jaícina jóíñedeza.

3 O fueñe ínoga íaioi llófuiamo uibíoicairi. Afena jeire o oíri. Afe llezica o comécimo itífue ñúefuena méidori. O abina ñue onóñenia, merírifiredimie

ónonino billa izói, duere omo fínuaibiiticeua. Cue billíruina ónoñeitío.

⁴ Mei íadí ómoimona jadí Sárdismo dáarie comécina ñúemacina ite. Afémaci iníroina íáiñedino izoide. Afémaci úzecuiruai jítada cue diga jáitiaioi, mei afe daí íaioimo dúideza.

⁵ Fiénidena anáfenodinona jáidino úzecuirona jítaitaioi. Iemo zíñona cáaitino mámecei cuiánicomona íaioi mámeceiaina dóñeitice. Iemo daje izói cue Moo Juzíñamui uícomo “Bie cúemaci” dáitice; daje izói ie abi imaci ángeles daínamaci uícomo “Bie cúemaci” dáitice.

⁶ Ñuera Joreño Juzíñamuimo jaináidinona daínamo cacáacadimie mai áfemo cacai.” Aquie izói daide.

Filadélfiamo ite ínotinomo llogáuai

⁷ Daje izói Filadélfiamo ite Juzíñamuimo jaináidino úiñoraimamo bíuai cúeiri: “Afe níifuenidimie omo úrite. Afémie uáfuena úrifiredimie. Afémiemo jaii illaíma David naze tuiñora llave ite. Afémie Juzíñamui illáimana illano tuiñóadi buna íbáinide. Daje izói afémie íbáia, buna zuitánide.

⁸ Bímie bie izói ona daide: Nana o finócana onódice. Buna íbáinide túide naze o uíecori jónetice. Mei figo maíriñedio, íadí cue uaina náfuetío; cuena jaca jáanofinidío.

⁹ Iemona Taífemo jaináidinona o anamo caiñícido ana íaioi dújutano óreitice. Afémaci táinona úrillano bie izói daíífrediaioi: “Cai bie Juzíñamui nizeca judíuaídicaí” daídíaioi, mei íadí íeñediaioi. Nana baimaci o anamo dújutaitice, íemona ona cue izíruillana fídítiaioi.

¹⁰ Cue ocuica uai jeire o úamona aféuai daina izói comécina járidoñedio. Ie jira nana bíniemo bite facátalliruimona ona ñue ráiruiticue. Aféruido nana bíniemo ite comini facátalliaioi.

¹¹ Raire biticue. Omo ite ñúefuiaí ñue rairuiri, o jirídolle raa bu báiroñeilleza.

¹² Fiénidena anáfenodinona jáitinona cúeiena máiñoiticue. Máíñuano cue Juzíñamui gairíracomo ite mairide jáillirai izói íaioina óreiticue. Iemona Juzíñamui illánomona jaca jino jáiñeitiaioi. Iaioimo cue Juzíñamui mámecei cúeiticue. Daje izói cue Juzíñamui jofue mámecei íaioimo cúeiticue. Afe jofue mámecei “Comue Jerusalén.” Afe jofue cue Juzíñamuimona caífo monámona ana bite. Daje izói afe fiénidena anáfenodinomo cue comue mámecei cúeiticue.

¹³ Ñuera Joreño Juzíñamuimo jaináidinona dáinamo cacáacadimie mai áfemo cacai.” Aquie izói daide.

Laodicéamo ite ñnotinomo llogáuai

¹⁴ Daje izói Laodicéamo ite Juzíñamuimo jaináidino úiñoraímamo bíuai cúeiri: “Uáfuenta llotímie omo úrite. Afémie jaícina uai nabáífredimie; daje izói jaca méidoñeno uáfuenta úrifredimie. Afémie nana Juzíñamui finócana tainérama.

¹⁵ Afémie bie izói ona daide; Nana o finócafuiaina onódicue. Ráairuillano figo o ñnoñenana onódicue. O ñnoga ñue uzírediji izóiñede. Daje izói o ñnoga caimare mánaidiji izóiñede. Ñue o uzírenana jitáidicue, ñbai jáífodo o mánainana jitáidicue.

¹⁶ Mei íadi jabo uzírediji izóidío. Iemona jabo uzírediji jino tua izói ona jino dótaiticue.

17 Bie izói daiífiredio: “Ráaredimiedicue,” daidío. Iemo “Nana cue illafue ñue jóide. Cue jitaica raana iñede,” daiífiredio. Mei íadi jíáfodo o íllana onóñedio. Juzíñamui eróicana bu cáimadoñegamiedio. Iemo daje izói iere duere zefuítagao, íemo iere dúeredimiedio, íemo uina cíoiñedimie izóidío. Iemo jíai ínícuironino emuíromade izóidío. Afe bie izói o íllana jaca onóñedio.

18 Mei jira omo llóiticue, “Traimo ñue finoca órona cúemona íba, uáfuenta ráaredimiena o jáillena. Daje izói cúemona úzerede ínícuirona íba, o meáire emuíromana íbáillena. Daje izói ui manórajina cúemona íba, o uimo jóoniamona ñue o cíoillena.

19 Nana cue izíruiganona lletádicue; daje izói íaioina duere finódicue ñue íaioi íllena. Mei íemona Jesucrístomo izire o jáináicaillano, iere o ínofireiri. O comeci ífuiái méidori, ona duere cue fínoiza.

20 Ero cacai, come comeci naze ízoinamo iticue. Dínómona jíiriticue. Cue uaimo cacáreitimie ie naze tuiñoadi cue llínollena, afémie illánomo jofó jáiticue. Jaillano dájena afémie díga nabáiriticue. Daje izói conima díga caimare úriticoco.

21 Fiénidena anáfenodinona jáitinona, illáimana cue ráíranomo afémiena cue díga ráítaiticue. Mei daíí fiénidena cue anáfenuamona cue Moo illáimana ráíranomo ráinazaidicueza.

22 Nuera Joreño Juzíñamuimo jáináidinona dáinamo cacácadimie, mai áfemo cacai.” Aquie izói daide.

Monamo Crístomo lloga cámafuiái

¹ Bie méifomo éroidicue, monamo ite naze túinana ciódicue. Fueñe cue cacana uaina meine nane cacádicue. Afe uai vudugoi ficírena izói cacaide. Afe uai cuena daide:

—Caifo benomo bi. Bífuiái méifomo raire cómutifuiaina omo ácataiticue, —daide.

² Afe llezica Ñuera Joreño anamo itábicaidicue. Iemona monamo ite illaíma ráiiranona ciódicue. Afénomo dáamie ráiinana ciódicue.

³ Afémie iere quérede ‘jaspe’ daina ráifide nofiji izói éroide. Aféjina jíáifo daina ‘cornalina.’ Afe ráirano abido rózigüeo nágafene ífoina ite. Afe rózigüeo ‘esmeralda’ daina ráifide nofiji quenírena izói quenírede.

⁴ Iemo afe ráirano abido veinticuatro diga jíáie illaíma ráiranuaina nágafene ífoina íllana ciódicue. Afénuaimo veinticuatro diga mona ero ocuide éicomini ráiidiaíoi. Afémaci úzerede iníroillai jíadáíoi. Iaiíoi ífomo oro finoína illaíma jíáfíregacuífoi jíiena.

⁵ Afe áillue ráiranomona aillo boride. Afe llezica afénomona iere ficire mona gíría cácaide. Iemo afe ráirano uícomo siete dígade áillue bobáieniai bóoide. Afe siete diga bóoide bobáieniai Juzíñamui Ñuera Joreño jana.

⁶ Dáanomo afe ráirano uícomo, daa monáillaina eroide illa. Afe monáillai anáfenemo ñue cíoide vidrio izoide.

Afe ráirano abido cuatro diga cáadimíiai ífoina itíaiíoi. Afémaci erófene dibénemo aillo uíjiai ite. Daje izói emodo dibénemo ite.

7 Bimácimona daa jánallarina eroide. Iemo jiáie juráreto ítona eroide. Iemo jiáie uiéco, come uiécona eroide. Iemo jiáie feede máajaiñona eroide.

8 Afe cuatro diga cáadimíaimo illa dígamíemo seis diga íaicuai ite. Afe íaicuai erófenemo uíjiaina oruide; daje izói emódo dibénemo ite. Afémaci mona naio diga líicaiñeno úritiaioi; Juzíñamuina daiíoidiaioi:

¡tere íaifuenidio! ¡tere íaifuenidio! ¡tere íaifuenidio!
tere ñuera cai Ocuíraimadio.

Jamánomo ríinorede Juzíñamuidio.

Jaca nanómona itímiedio,

Iemo nai birui itímiedioza,

Iemo uire jaca ninomo zíiñona íitímiedioza, —daií daiíofirediaioi.

9 Illa dígacaiño afe cáadimaci, ráiiranomo ráide Moo Juzíñamuimo ebíredifue nitáadi, íemo ñúefue jóoneadi, íemo jíai figora íena dáiiadi,

10 afe llezica afe veinticuatro diga ocuide éicomini áillue ráiiranomo ite Juzíñamui anamo dújufirediaioi. Iemo afe jaca ninomo zíiñona itímiena caimátaidiaioi. Afe llezica íaioi oro finoina illaíma ífo icuífuai ráiirano uícomo jóonefirediaioi. Jóneta daiífirediaioi:

11 Cai Ocuíraíma Juzíñamui,

tere ebíredifue omo nitáregaza,

Daje izói ñúefuiai omo jóonefíregaza.

O jamánomo ríinorenana omo nitáregaza.

Nana aféfuiai ona náamaredeza.

Mei naga ráaniai o comuítaga.

Iemo o comeci jítaina izói itíaioiza.

Daje izói o comeci óiacanamona finócaiaioi.

Aquíe izói daiífirediaioi.

5

*Ráiidimie líiga rabénicono ciódicue naa Cordero
daiínámie Cristo díga*

¹ Afe méifomo illaíma ráíiranomo ráiidimie nabézimo ite rabénicono ciódicue. Afénico ferínoga rabe. Erófenemo cuega, daje izói jinófenemo jíái cuega. Afénico siete díga sello daína ñue ibaira raado ibaica.

² Iemo ríirede ángel daína Juzíñamui abi ímiena ciódicue. Afémie ficírede uaido jicánofirede; daide:
—¿Bie sello mei cuatállena bu ñuena? ¿Bumo ñue dúide binico tuiñóllena? —daide.

³ Mei íadi afénico tuiñoitimiena iñede. Caifo monamo iñede. Biniemo iñede, íemo bínie anamo tíidino illánomo jíái daje izói iñede. Daje izói afénicomo buna eróinide afe facádollena.

⁴ Afénico tuiñoite comécina ñúemiena baiñénamona iere éedicue. Daje izói afénico facádoitimie iñénamona, íemo jíái afénicomo eróillano ónoitimie iñénamona, iere éedicue.

⁵ Iemona veinticuatro díga eicomínimona dámie cuena daide:

—Mai benómona éeñeno o iri, mei Judá nairai illaíma Jánallarina mamécamie, fiénidena jae ñue anáfenotateza. Afémie jaiái illaíma David erófene igímamona comuídimie. Afe ie anáfenuamona afémie binico tuiñolle ríino ote. Daje izói afe siete dígade sello cuatalle ríino íemo ite, —daide.

⁶ Iemona afe ráíirano cígimo, íemo afe cuatro díga cáadimíai cígiri, íemo afe veinticuatro

diga éicomini cígimo, Cordérona mameca Crístona ciódicue. Afémie táide, mei íadi Juziñamuimo fia fecállena ie íaioi fáina meifo cíoide. Afe Cordero siete diga zícárede, íemo ie ui siete dígade. Afe siete dígade uíjiai naga éniáimo oreca Juziñamui Ñuera Joreño jana.

⁷ Afe Cordero illaíma ráíiranomo ráiidimie nabézimo ite rabéniconá llínuaide.

⁸ Afémie afénico llínua llezica afe cuatro dígade cáadimíai, íemo afe veinticuatro dígade ocuide éicomini afe Cordero anamo dújudiaioi. Afe eicomínimona illa dígamie ‘arpa’ daína rua roia taiga raa llíediaioi. Daje llezica afémaci oro finoína ugúciaína oruide ichecoí llíidiaioi. Afeníai Juziñamuimo jaináidino afémíemo jícara uailai jana.

⁹ Afe éicomini bie comue rua rotíaió:
O iere comécina ñúemienamona bie rabénico
llínota tuiñolle omo dúide.

Mei nauí Juziñamuimo fatá fecácamedioza.

Caina o die tóillado Juziñamui íena ibádiaza.

Uáfuena nágaziemona,

Iemo nana jíáífo úritinomona,

Iemo naga comini jófuiamona,

Iemo nana náiraiamona Juziñamui íena caina
ibádiaza.

¹⁰ Cai Juziñamui ie illáinina caina jáitatio;

Daje izói comínido Juziñamuimo úrifireitinona
caina jóonetio;

Iemona énie náiraiaina ócuiticai.

Aquíe izói rotíaió.

¹¹ Afe mei eróidicue. Iemo aillo afe illaíma ráíiranomo ífoína ite ángeles daína Juziñamui abi

imaci úrilla uaina cacádícue. Daje llezica afe cuatro diga cáadimíai uaina cacádícue. Iemo dáaruido éicomini uaina cacádícue. Afe Juzíñamui abi imaci iere jamánomo aillo itíai. Ua millones y millones dáinaze itíai.

¹² Afémaci fícirerie úritiaí; daidíaí:

Fatá Juzíñamuimo fecaca Cordero comécina iere
ñúenamona ñuera ríino maiñolle afémiemo dúide.

Daje izói aillo ráifide ráaniaí dáamiemo dúide.

Iemo ifoci déillafuiaí dáamiemo dúide.

Iemo nana ñuera máirie dáamiemo dúide.

Iemo nitárega ñúefue dáamiemo dúide.

Iemo ñuera ébifue dáamiemo dúide.

Iemo aillo afémiemo caimátaille uai afe Cordéromo dúide.

¹³ Afe llezica nana Juzíñamui comuítaganuiái úrilla uaina cacádícue: nana monamo itínuiái, daje izói éniemo itínuiái, daje izói énie anamo itínuiái, daje izói monáillaimo itínuiái, naa afénuiaimo itínuiái úrilla uaina cacádícue. Daidíaí:

Nana caimátaille uaillaí illaíma ráíiranomo ráiide
Moo Juzíñamuimo íredeza,

Daje izói jíái Cordéromo íredeza.

Afe izói ñúefue afe íaillinoímo nitáredeza, naa ñuera ébifue diga,

Iemo ñuera ríino íaillinoímo íredeza.

Nana aféfuiaí íaillinoímo nana fimónaíaido, jaca ninomo ziiñona daí daírenaza.

¹⁴ Iemo afe cuatro diga cáadimíai aiáirilla izói daidíaí:

—¡Daiítadeza! —daííofírediaí.

Iemo afe veinticuatro dígade éicomini ana dújuillano, jaca ninomo ziiñona cáadimie mo caimátaioifirediaioi.

6

Siete dígade sello daina rabénico ibaira rafue

1 Cordero afe siete dígade séllomona nánora tuíñuana ciódicue. Daje llezica cuatro dígade cáadimieimona dáamie dainana cacádicue. Ie úrilla uai, mona giria ficirena izói ficirede. Daide:

—Mai eróizaibi, —daide.

2 Cue eroilla llezica úzerede cabállona ciódicue. Afe emódomo ráicaidimie zicaira llícaide. Iemo illaíma ifo icuífoina ie jítadiaioi. Jita mei afémie naga náiraina anáfenocana jaide. Ie mei nágaruillaído afémie íaioina anáfenofirede.

3 Méifoide séllona Cordero cuata llezica, tórona éroide cáadimie úrillana cacádicue. Afémie:

—Mai eróizaibi, —daide.

4 Afe llezica jáirede caballo jino bíllana ciódicue. Afe emódomo ráicaidimie mo féitalle ríino afémie mo iga. Afémie nana nairai caimare uái illa féitaite, comini conímana fazítallena. Afe llezica áillue lloébicina afémie mo iga.

5 Iemo Cordero nane jíaie tercer daina sello cuata llezica, jíaie cáadimie úrillana cacádicue. Afémie:

—Mai eróizaibi, —daide.

Jira eróidicue. Eróidicue mo daa jítirede cabállona ciódicue. Afe emódomo ráicaidimie mérenana onóillena facara raa llícaide.

6 Iemo cáadimie mo cígimona dáamie úrilla uai cacádicue. Aféuai daide:

—Daa kilo trigo daa mona táijina fidi. Iemo daámani kilo cebada daa mona táijina fidi. Iemo aceite vino diga jaca jeruúdeza, mei afe iballe úcube iñédeza, —daide.

⁷ Afe mei Cordero jiáie ‘cuarto’ daina sello cuata llezica, cáadimiiaimona íraimie úrillana cacádicue. Afémie:

—Mai, eróizaibi, —daide.

⁸ Eróidicueмо borárede cabállona ciódicue. Afe emódomo ráicaidimie titáfiredimie dainámie. Afémie óodana tíidino illano jana maméidimie bite. Enie cuatro diga fecácamona dáanie íemo iga, afénomo riire ocuúllena. Afénomo comínina fuiríllado íaioina tícoizitaite. Iemo daje izói júbiedo íaioina tícoizitaite. Iemo dúicuaído íaioina tícoizitaite. Iemo éniemo ite illáirede rílleníai íaioina tícoizitaite.

⁹ Afe mei Cordero jiáie ‘quinto’ daina sello cuata llezica, ‘altar’ daina Juzíñamui caimátaitarano anamo ite, titaca comini coméciaina ciódicue. Afémaci Juzíñamui uai llócailla ícoinia titácaiaioi.

¹⁰ Afe bimaci ficire úritiaioi; daidíaioi:

—Íaifuenide cai Ocuídime, uícodo o llógana méidoñeno ñue fuitáfiredio. Eniemo ite cai titádino iere jicánota duere o finóllena, ¿nié dinó nai mozíñoitio? Cai fatino iba o ollirui, ¿nigarui nai bai dúiñoitio? —daidíaioi.

¹¹ Mei jira afe altar anamo itímaci úzecuiruaina igáiaioi. Afe llezica nai nano íanori ocózinaitagaiaioi. Mei nana íaioi tíilla izói uire titállino, Juzíñamui mámanomo nai dúciñede. Afe titállino, nauí íaioi titaca ámatiaí izói, Cristo uaimo táijifirediaioi.

¹² Cordero nane jíáie ‘sexto’ daina sello cuata llezica, eróidicueмо, énie iere jacire docaide. Iemo jitoma zúunaillana, jítaca jítiroi izói éroide. Afe llezica fiui náauina jíairede die izói méidoficaide.

¹³ Afe dáaruído mona ero ucúduai cocídiaioi. Ua, higuera daina amena llizilla, jairifo riire begüñuamona cócia izói, afe izói ucúduai ana bíñiemo cocídiaioi.

¹⁴ Afe llezica, rabe jofu ferírioicailla izói, mona ferírioicaide. Iemona cíbicañena. Iemo dáaruído nana caifóneduai naa monáillai cigi íduai íaiói illánomona oni jírecaide.

¹⁵ Iemona nairai illaini caifóneduai anamo ite ífuaimo, naa jéerie noficiai cigiedo retáiritiaioi. Afénomo jamánomoidino daje izói retáiritiaioi. Iemo aillo ráanaitino, íemo fuiríraini illáicomini, íemo iere riiredinuai, íemo nana jacire rairuícano, daje izói buna ráiruiñegano, nana afénomo retáiritiaioi.

¹⁶ Afémaci caifóneduaina jéerie noficiaina daiífirediaioi:

—¡Mai caimo baii! Mai caina jiita, baie illaima ráiranomo ráide Juzíñamuimona caina rétaido. Cordero finolle jacire cai duere finóllifuemona caina rétaido, —daiífirediaioi.

¹⁷ Mei jii, iere jacire comini duere finóllirui jae dúcidez. ¿Bu mei áfena mozíñorena?

7

Israel náiraimona náamana onóillena cuegámaciai

¹ Bie méifomo bínie fuédaiaimo cuatro dígade ángeles daina Juzíñamui abi ímíai, naidáienana

ciódicue. Afémaci nágafeniaimona jairifo jáiñuana moziñotiaioi. Afe éniemo jairifona jaiñótañediaioi, daje izói monáillaimo jaiñótañediaioi, íemo jái aménaiaimo jaiñótañediaioi.

² Iemo jáie Juzíñamui abi ímiena mona móimona bíllana ciódicue. Afémie caade Juzíñamui íeie daiíllena sello daina jóonelle raa líicabite. Afémie ficire úrite. Enie fuédaiaimo cuatro diga naidáidimiaimo úrite. Afémaci binie fieni íaioi finolle, naa monáillai diga ríinona igámaci. Afémacina bímie daide:

³ —Cai Juzíñamui ocuífireganomo, íaioi ozócimo náamana onóillena mámece nai jóoneñena llezica, nai bíniena duere finóñeno iri. Daje izói monáillai naa aménaia raire duere finóñeno iri.

⁴ Jónia mei, nígamaci náamana onóillena mámeceina jóonegano íaioi número na cacádicue. Nana Israel náiraimo itíziaimona afe cuegano ciento cuarenta y cuatro mil dígade.

⁵ Judá izíemona doce mil diga cúefide.

Iemo Rubén izíemona doce mil diga cúefide.

Iemo Gad izíemona doce mil diga cúefide.

⁶ Iemo Aser izíemona doce mil diga cúefide.

Iemo Neftalí izíemona doce mil diga cúefide.

Iemo Manasés izíemona doce mil diga cúefide.

⁷ Iemo Simeón izíemona doce mil diga cúefide.

Iemo Leví izíemona doce mil diga cúefide.

Iemo Isacar izíemona doce mil diga cúefide.

⁸ Iemo Zabulón izíemona doce mil diga cúefide.

Iemo José izíemona doce mil diga cúefide.

Iemo Benjamín izíemona doce mil diga cúefide.

Aillo dáanomo úzecuiruai jítada gairídino

⁹ Afe méifomo eróillano jamánomo aillo comínina ciódicue. Nana náiraiamona dáanomo bitíai. Daje izói nágaziemona bitíai. Iemo daje izói jiáifo úritinuíamona bitíai. Iemo daje izói naga jófuaiamona bitíai. Nana bimaci illaíma ráirano uícomo naidáidiai. Daje izói Cordero uícomo naidáidiai. Afénomo aillo itíaiiza buna facádonide. Nana afémaci úzecuiruai jitáoidiaí. Daje llezica afémaci rafóruai llíediaí.

¹⁰ Nana fícirerie daídíaí:
Cai jíllonano, illaíma ráiranomo ráide cai Juzíñamuimona comuide.
Daje izói cai jíllonano Cordéromona comuide, daídíaí.

¹¹ Afe llezica nana Juzíñamui abi imáciaí, illaíma ráirano onido ífoina naidáiediaí. Daje izói veinticuatro dígade éicomini onido ífoina naidáiediaí. Iemo jiái cuatro díga cáadimíai onido ífoina naidáidiaí. Afémaci afe ráiranomo ráidimie anamo éniemo fueco diné bíjicaidiaí. Bíjicaillano Juzíñamuimo caímátaidiaí.

¹² Daídíaí:
¡Bie izóideza! Ñúefuai nitalle cai Juzíñamuimo dúide, ñue ebíredifuai díga.
Daje izói nana ñue onóigafue íemo dúide, naa figora daíífirena díga.
Daje izói aféniemo nitárede ñúefue dáamiemo dúide, naa áillue máirie díga.
Nana bífuai cai Juzíñamuina jaca ninomo zíñona daí daírenaza.
Aquíe izóideza, —daídíaí.

¹³ Afe mei afe eicomínimona dáamie cuemo jicánote:

—¿Baie buoi úzecuiruai jitáoina? ¿Afémaci mei ninena bitíaiói? —daide.

¹⁴ Jira íena daidicue:

—Afena onóñedicue. O ñue onódio, —daidicue.

Iemo afémie cuena daide:

—Bimaci aillo duere zefuilla ícoimo jino bitino.

Afémaci comécina iere íaifuenino íaiói íllena ja Cordero díedo muiñócaza. Afémaci iere úzecuiro inícuiro illa izói itíaiói.

¹⁵ Ie jira Juzíñamui ráirano uícomo itíaiói. Afe llezica nágaruillai, mona naio diga, Juzíñamui gairiraco ero ie ocuállana finófirediaíói. Iemo afe ráiranomomo ráide Moo Juzíñamui, íaiói diga íllado jácifuemona íaioina ráiruite.

¹⁶ Afémaci jaca júbiemona duere finóbiñeitiaíói. Daje izói jiróacanari duere zéfuiñeitiaíói. Iemo jitoma íaioina jái úzitañeite. Daje izói uzírediruimo mona uzírena íaioimo uzire cácañeite.

¹⁷ Mei illaima ráirano abimo ite Cordero, ovejai uíñua izói íaioina uíñoiteza. Afe llezica ñuera jainoi jino toránuaído íaioina ifóicaite. Afe jainoi zíñona cáatatiji. Iemo afémaci éeadi Juzíñamui íaiói ui jeme nana oni dóite.

8

Iraie sello cúatajana cioide, oro finoina uguci uillítara diga

¹ Iemo Cordero llíga rabénicomo ite íraie sello daína íbáioide raa cuata llezica, daa hora átuedo mona tii daiíñoacaide.

² Afe mei siete dígade Juzíñamui abi imaci Juzíñamui uícomo naidáienana ciódicue. Afémaci siete diga vudugoi izoide raana igáiaíói.

³ Afe mei jíáie ángel dainámie Juzíñamui abí ímie oro finoina uguci uillítara llícabillana ciódicue. Afémie altar daina Juzíñamui caimátairano uícomo naidaide. Iemo aillo ugúciai afémiemo fecácaza, áfena Juzíñamuimo uillítallena. Mei nana Juzíñamuimo jaináidino afémiemo íaiói jicáfirena uaillai llua llezica, bímie dáanomo afe ugúciai Juzíñamuimo uillítaiteza.

Afe Juzíñamui ráiirano uícomo ite oro finoina ie caimátairanomo, bímie afe ugúciai jutade; íemo afe llezica afe Juzíñamuimo jaináidino jicáfirena uaillai llócaigaza.

⁴ Afe uguci uíllie, Juzíñamui abí ímie áfena altarmo juta mei, Juzíñamui uícomo caifo uillíicaide, nana Juzíñamuimo jaináidino jicáfirena uaillai diga.

⁵ Afe mei Juzíñamui abí ímie uguci uillítara raa llínote. Llínuano altármona oga caade iráiciaina áfena oruíate. Daií fínuano ana éniemo dotade. Afe dota llezica mona jacire giride naa ficíriede raari. Iemo aillo améuai llairide. Iemo énie jacire docaide.

Siete dígade vudúgoina eroide raa

⁶ Iemo afe siete dígade vudúgoina eroide llíide Juzíñamui abí imáciai afe vudugoi fúunollena maméritiaíoi.

⁷ Nanóidimie fúunua llezica, jéerie nocíjiaí éniemo cocítate. Afe dáaruido réici diga die taméricaide éniemo cocítate. Afe cóciamona éniemona jarífenie boode. Daje izói nana

aménaiaimona jarífenaiaia boode. Daje izói nana caade ráitiaimona jarífene boode.

⁸ Afe meifo Juzíñamui abi ímie ie vudugoi fúunua llezica, boode áillue íduna éroide raa monáillajimo dotaina. Iemona monáillajimona jarífeido díena jaide.

⁹ Afemona nana afénomo ite caade chámuniaimona jarífeniaia aillo tícoizitiaioi. Daje izói afénomo ite jéerie bárconiaimona jarífenedo aillo niné táinocaidiaioi.

¹⁰ Iemo jíáie Juzíñamui abi ímie ie vudugoi fúunua llezica, áillue ucudu monámona éniemo baíide. Afe ucudu bobaie izói boode. Afe bóodicudu nana imánillaimona jarífemanimo baíide. Daje izói éniemona jainoi jino toránuaimo baíilla.

¹¹ Afe ucudu mámece Eríredicudu. Iemona nana imánillaimona jarífemanillaie eríriede. Iemona afe jainoi erire jáillamona aillo comini tídiaioi.

¹² Ie mei nane jíáie Juzíñamui abi ímie ie vudugoi fúunua llezica, jítómamona jarífetomado jítirecaide. Daje izói fiuímona jarífeuido jítirecaide. Iemo jíái ucúduaimona jarífecududo daje izói jítirecaide. Ie jira nana afémacimona jarífenedo jítirecaide. Naga mona naio diga jarífemonana egáíñoñediaioi.

¹³ Afe méifomo caifo monamo éroidicue. Afe mona erodo feede Juzíñamui abi ímiena cacádicue. Afémie ficire úrioicaide. Daide:

—Aii. Eniemo ite comini nii dúerena; mei Juzíñamui abi imácimona daámani nai fiébide vudugoi fúunollena. Afémaci fúunua llezica énie imaci, ¡Nii duere zéfuitaioi! —daide.

9

¹ Iemo nane jíáie Juzíñamui abi ímie ie vudugoi fúunua llezica, daa ucudu monámona éniemo baiillana ciódicue. Iemo fiénide jóriai ibáirafo zuitara llave afe ucúdumo iga.

² Afemona afécudu aféfonta tuiñode. Tuiñuamona aféfonta jacafai bóua uíllia izói caifo uillide. Aféfonta caifo uillide uíllie jitómana dúitate. Afe llezica mona erona jítire finode.

³ Afe uílliemona bíniedo feede fíuái comuide. Afémaci, éniemo ite acáiduai izói molléroirediaioi.

⁴ Afémaci ráitie güíllena rairuícaiaioi. Daje izói nana amena rábiaina guitatañegaiaioi, naa jíáie mócore zicode ráaniai diga. Daa comini duere finóllena orécaiaioi. Mei íadi dani Juzíñamui ie daiitate mámece ozócimo cúeñeganona, afe fíuái duere fínoitiaioi.

⁵ Mei íadi afe fíuái comínina títatañegaiaioi. Mei jíáifodo afémaci cinco diga fui comínina izi cácataitiaioi. Afe fíuái mailla, acaido come mailla izói izíreite.

⁶ Iemona aféruillaido comini, “Raíre cue tílli” dáitiaioi, mei íadi tíñeitiaioi. Iere tíiacaitiaioi íadi, títáfirede raa afémacimona oni jica jáite.

⁷ Afe fíuái jóbairizaillena mamérilla cabállona eróidiaioi. Iaiói ifócimo oro finoina illaíma ifo icuífoina éroide jíina. Iemo íaiói uiéco come uiécona éroide.

⁸ Iaiói ifóti ringo ifótiina éroide. Iaiói ízie ‘león’ daína jánallari íziéna éroide.

⁹ Iemo llojécuiroi izoide abi riídote icogí íaiói jogóbemo jíide. Iaiói féeoína jamánomo ficírede.

Uafue, jóbairizailla caballo zonóicaiga ‘cárroniai’ ficirena izói ficirede.

¹⁰ Iemo afémacimo ite ooda acaido ooda izói molléroirede. Afe óodamo cinco díga fiui comini duere finolle ríino ite.

¹¹ Afe fíuui illaíma ite. Afémie fiénide jóriai ibáirafo úiñotimie. Afémie mámecei hebreo uaido Abadón; iemo griego uaido Apolión. Afeci daiácade “Niné táinocaitaimie.”

¹² Nanoide jacire izi cacánafue jae záaide. Mei íadi nai mena fiévide.

¹³ Iemo nane jíaie Juziñamui abi ímie ie vudugoi fúunua llezica, Juziñamui uícomo ite oro finoína al-tar daína afémiemo caimátairanomona úrilla uaina cacádícue. Afe uai afe caimátairanomo ite cuatro dígade caifo fáide zicai cígimona cácaaide.

¹⁴ Afe uai jae vudugoi fúunote Juziñamui abi ímiena daide:

—Afe cuatro dígade Eufrates imani abímo cuinaca ángeles izóidino mai zuitari, —daide.

¹⁵ Jira zuitácaiaioi, nana comini jarífenairaido titállena. Mei aféruimo dúcinamona bai óllena eneno mamécaiaioi. Daje izói biruimo dúcinamona mamécaiaioi. Daje izói bie fiui íena mamécaiaioi. Iemo daje izói bie fimona íena mamécaiaioi.

¹⁶ Afe cuatro díga ángeles ocuúllino aillo ite. Nana afémaci cabálloniai emódomo ráiediaioi. Iemo afémaci dígadiaoí daínana cacádícue. Afémaci do-scientos millones dígadiaoí.

¹⁷ Bie izói éroide cabálluai nicaído ciona izói ciódícue. Afe cabálluai emódomo ráidino jogóbiaimo llojeco jitáoidiaioi. Afe llojécuiromo jáire, mócore, borare cuega. Iaiói cabálluai ifo

'leon' daina jánallari ifona éroide. Afémaci fuémona irai izói jino bite, íemo uíllie bite, íemo daje fuémona nairai iere uzire cóonaitalle raa jino bite.

¹⁸ Afe cabálluai fuémona bite daámani jacire táinocaitate ráamona aillo nairai fuite. Uafue, nana comínimona jarífenairai tíidiaioi.

¹⁹ Daje izói afe cabálluai óodamo jacire títaite ríino ite, mei afe ooda jaiona eróideza; ifóredeza. Afedo comínina ainízicana uite.

²⁰ Mei íadi tíidinomona fiébidino, baie daámani jaciredemona tíñedino, íaioi finófíreiga fiénidífuiái féitaacaiñediaioi. Daje izói fiénide jóriaimo camátaitajana fáicanocaiñediaioi, naa jíáíforie finoca jánaraiaina. Dáarie afe jánaraiai oro finoína, jíáie plata finoína, jíáie bronce finoína; íemo jíáie nofíci finoína, íemo jíáie amena finoína. Nana bie jánaraiai jaca cióñede; daje izói minícana cacáñede, íemo daje izói macáñede.

²¹ Afe fiébidino jíáimaci méiniana fáicanocaiñediaioi. Daje izói jíáima fue gáiana fáicanocaiñediaioi. Daje izói íaioi jíruírenana féitañediaioi. Daje izói íaioi merírífírenana féitañediaioi.

10

Daa ángel dainámie Juzíñamui abi ímie duera rabénico líide

¹ Afe méifodo rírede Juzíñamui abi ímie monámona ana bíllana ciódicue. Afémie uíllie cígido bite; íemo afémie ífomo rózígüeo izoide jíina. Ie uíéco jitoma egáiñua izói quenírede. Iemo ie idai boode jáállirai izói éroide.

² Afémie daa duera rabénico tuiñoda llíide. Ie idai nabezi monáillaimo bitade, íemo ie jarífezi éniemo bitade.

³ Iemo jánallari ficire irilla izói ficire úrite. Afémie úrilla mei, mona siete dígcacaiño giride; ie gíría come úrilla izói cácaide.

⁴ Afe siete dígcacaiño mona gíría llíicailla mei, íaioi daina uailai cúeiacadicue. Mei íadi cúeiacadicuemo monámona daa uai cuemo úrillana cacádicue; daide:

—Afe siete dígcacaiño mona gíría uailai rabemo cueñeno iri; báinino comécimo o jóneri, —daide.

⁵ Afe mei afe monáillaimo naidaide, éniemo naidaide Juzíñamui abi ímie, ie onoi nabezi monamo zitáaide.

⁶ Afe llezica ziiñona ite Juzíñamui mámece llíinuano riire úrite. Afe dáaruido énie comuítatímie mámece, daje izói monáillai comuítatímie mámece, íemo nana afénomo ite cáadinuiai comuítatímie mámece llíinota riire daide:

—Benómona jaca ja móziñoñelleza.

⁷ Jabe siete dígademona íraimie Juzíñamui abi ímie ie vudugoi fúunolliruimo dúcille llezica, Juzíñamui jica ia comécido báinino mamécáfue, ñue ícoimo zaite. Daí Juzíñamui ie uai jino llórainimo jaiái uícodo llote. Afémaci dani ie ocuífiregano, —aquíe izói daide.

⁸ Naui monámona cue cacana uai nane meine cuemo úrite. Cuená daide:

—Afe éniemo monáillaimo naidáidímie ónoimo ite túide duera rabénico mai llíinuai, —daide.

9 Jira afe Juziñamui abi ímiemo afe duera rabénico jícajidícue. Jicádícuemo afémie cuena daíde:

—Llínota mai güi. Afe duera rabénico o fuemo cíiji naimérena izói cácaite, mei íadi o jébemo erire cácaite, —daíde.

10 Mei jira Juziñamui abi ímie ónoimona afe duera rabénico llínota güitícue. Güitícuemo cue fuemo cíiji izói naimere cácaide. Mei íadi afe ja cue güilla méifodo cue jébemo erire cácaide.

11 Afe mei cuena daídíaíoi:

—Juziñamui daina aillo comini jófuiaimo cómutifuiái, meine dáanomo llóredíza. Daje izói aillo náiraíaina Juziñamui dánana llóredíza. Iemo daje izói jíáíforie úritinona Juziñamui dánana llóredíza. Iemo jíái aillo illáinina Juziñamui dánana llóredíza, —aquíe izói daídíaíoi.

11

Uai nabáifrede íaillínoi

1 Afe mei ápera rázina cuemo itíaíoi. Afezi jofó facáradozina eroide. Afezi cuemo fécano cuena daídíaíoi:

—Mai náidacaillano dama Juziñamui gairíracó nie dinóride fácaji. Daje izói Juziñamui camátairano o fácaji nie dinóride. Afe llezica afénomo nieze afémiemo camátaidímacina ite mai fácado.

2 Mei íadi afeco jinófebiri facáñeno o iri; mei afeno jicánemacimo dúideza. Afémaci Jerusalén daina íaífuenide jófuena cuarenta y dos díga fiuido fiéni anáfenoitiaíoi.

3 Iemo cue dibénedo úrilla uai nabáifrede íaillínoína óreitícue; come zuure ía jíitaca jíitícuero,

jítaitiaillinoi. Afe íaillinoi mil doscientos sesenta dígaruillai cuedo úritiaillinoi. (Afe mil doscientos sesenta dígarui, cuarenta y dos diga fiui.)

⁴ Bie cue uai nabáifirede íaillinoi ménade olivo amena izóidiaillinoi. Daje izói afe íaillinoi bínie comuítate Juzíñamui uícomo jónega mena boode áillue lámpara izóidiaillinoi.

⁵ Dáamie íaillinoina fieni finóacaniadi, afe íaillinoi fuémona irai oré diaillinoi, afe íaillinoi fáiacadinona náamiena cuarítallena. Nana íaillinoina fieni finóacadinona daíí títateza.

⁶ Bie cue uai nabáifirede íaillinoimo monámona noci bítañede ríino ite. Afe íaillinoi Juzíñamui dibénedo úricaille dinó, nocina bítañeitiaillinoi. Daje izói jainoi díena ória ríino íaillinoimo ite. Iemo jíái comíni duere fínoite nana jacírede duico comuítaja ríino afe íaillinoimo ite. Afe íaillinoi comeci óiacana dinori comínina duere finórediaillinoi.

⁷ Mei íadi afe íaillinoi táijina fuilla mei, iere jacire éroide caade rille afe fiénide jóriai íbárafomona jino bite. Jino billano afe íaillinoi diga fúirite. Fuiríllano íaillinoina anáfenoite. Anáfenua mei íaillinoina títate.

⁸ Íaillinoi túlle mei, cai Ocuíraima coráinanomo, níi afe Jerusalemo, afe áillue jofue cigi iomo, íaillinoi tíide abi fiénocaigaiaillinoi. Afe jofue mámecei, fieni íllana onótate uaido Sodoma dáina. Daje izói jíái Egípto dáina.

⁹ Iemo daruíamani átuedo diga jófuiái nairai afe íaillinoi abi túllamo acáritiaioi. Iemo íaillinoi abina raitátañeitiaioi. Daje izói dígazie íaillinoi abi bíinamo acáritiaioi, naa jíáifodo úritinuiari.

10 Bíníemo ite comini afe íaillinoi tíllari iere ióbidiaioi. Daje izói caimare íitiaioi. Afe caimare íaiói íllamona conímamo ráaniaina raiñoñoeno fécaitiaioi. Mei afe íaillinoi Juzíñamui dibénedo úricailla llezica, bimácina iere duere zefuítatiaillinoiza.

11 Mei íadi daruiámami átuedo jailla méifomo Juzíñamui afe íaillinoina meine abido cáatate. Iemo meine abido íaillinoina macátate. Iemona íaillinoimo acáritino jamánomo jacínaitiaioi.

12 Afe mei afe uai nabáifirede íaillinoi monámona ficírede uaina cacade. Aféuai íaillinoina daide:

—Caifo bené bi, —daide.

Jira íaillinoina éoidino éroidemo, caifo mona uílliedo monamo jáidiaillinoi.

13 Afe íaillinoi jailla llezica énie iere riire docaide. Afe riire docáíllamona afe áíllue jofue diez díganodemona dáagobe nana jáicoizite. Afemona siete mil comini tícoizitiaioi. Afemona fiébidino iere jacínaitiaioi. Jacínaillano monamo ite Juzíñamuina caimátaidiaioi.

14 Méifoide iere jácifue ja záide, mei íadi íiraie bille ja raírede.

Siete dígade vudugoi fúunotinomona ja íiraímie fúunote

15 Siete dígade ángeles daínámaci Juzíñamui abi ímíiaimona íiraímie ie vudugoi fúunote. Fúunua llezica, monámona díga ficíre úrilla uaillai cácaçaiilla; daidíaioi:

—Nana bíníe illaini illáimaillano naa íaiói ocuícánuaíri ja dájena cai Juzíñamuimo, íemo ie Crístomo jaináitaga.

Iemo afe Cristo jaca ninomo ziiñona ócuifireite, —
daidíaiói.

16 Iemona Juziñamui uícomo ráiide veinticuatro
dígade éicomini íaiói illaíma ráiranomona
ana bíjicaidiaíói. Uáfueza, afe úrilla llezica
éniemo fueco diné bíjicaillano, Juziñamuina
caimátaitadiaíói.

17 Iena daidíaiói:

Ona figura daidícai.

Jamánomo ocuide Juziñamuidioza.

Birui itímiedioza, íemo jaiái nanómona itímiedioza,
íemo jíái jaca ninomo ziiñona íitímiedioza.

Figura ona daidícai, mei o áillue ríino maiñódioza.

Máíñuano ja nane como ocuízaidioza.

18 Náiraiái icírinaizítiaíói, mei íadi íaiói duere o
finólliruimo ja dúcizaide.

Daje izói tíidino iere riire o jicánolliruimo ja
dúcizaide.

O dibénedo úrite o ocuífireganomo íaióiena o
mameca ñúefuiaina íaióimo fécaítio.

Daje izói o uaina ñue íinofirede ñue finócanomo
íaióimo dúide ñúefuiaina fécaítio;

íemo daje izói o mámecina jífánodoiñeno ñue
llínotinomo íitio.

Uáfueza, jamánomoidimíemo,

daje izói jamáimíemo íaióimo dúide raana íaióimo
ífiredio.

Daje izói bínie ñúemacina fiéniruitadino o
táinocaitalliruimo ja dúcizaide.

Aquíe izói afe éicomini daidíaiói.

19 Iemona monamo ite Juziñamui gairíraco
túijicaide. Afénono Juziñamui comini díga caimare

úrira raa uáfori cíocaide. Afe úrira raa emodo órona ibaica caja. Afe eromo Juziñamui lloga uaillai éenotiaioi. Afe gairíraco túijicailla llezica améuai riire llairide, íemo ficíriede ráaniai cacaide; íemo mona ficire giride; íemo énie iere riire docaide; íemo iere mairide nocíjiaí cocide.

12

Ringo íemo jacírede zicínaimana eróidimie diga monamo cíocaide

¹ Afe mei monámona jacírede onótate raa cíocaide. Afénomo iníroido ferínua izói, jitómado ferínoga ringo cíoina. Afengo idai anamo fiui cíoina, íemo afengo ifomo doce dígade ucudu illácuifoí, illaíma jitáfíregacuifoí izoide jitáoiide.

² Afe ringo úrue jocóacade izínailla. Afe iere izírenari caillícade; mei afengo úrue jécíacana llezica iere duere zefuídeza.

³ Afe méifodo jíaíe jacírede onótate raa monamo cíocaide. Afénomo áillue jíairede jacírede zicínaimana eróidimie cíocailla. Afémie siete diga ifórede. Iemo afémie diez diga zícairede. Afe ifóciaímo illa dígcáimo illaíma jitáracuifoí jíina. Daa ie mámece Taífe.

⁴ Ie óodado monamo ite úcuaimona jarífecuduna aillo dánomo jainánote. Jainánuano afécuduaina ana éniemo dotade. Afe 'dragón' daína zicínaimana éroidimie, afe úrue jocóacade ringo uiécomo jóoneoide, afe ie jocóacaga úrue jócua llezica raire ríllena.

⁵ Iemo afe ringo íza jocode. Afémie uire móonaia nana náiraiaina llojébici izóidedo riire ócuifireite. Afe úrue jócua méifodo Juzíñamui bairoca. Bairoda ie illáimana ráíranomo uiga.

⁶ Afe llezica afe ringo táizicimo botade. Afe dinomo afengo retáirillino uícodo Juzíñamui finoca. Afénomo mil doscientos sesenta diga mona afengo ecáecaille.

⁷ Afe méifodo áillue fuiríacana caifo mona eromo comuide. Afénomo Juzíñamui abi imaci illaíma Miguel naa jíáie Juzíñamui abi imáciari afe dragón diga fuirídiaíoi. Daje izói afe dragón naa ie abi imáciari fuirídiaíoi,

⁸ mei íadi afémaci Miguel náiraina anáfenonidiaíoi. Iemona dragón imaci illino monamo íñede.

⁹ Afe ie illino íñena jira afe riírede dragón monámona ja jino dotaca. Afe jaiai ninomo ite jaio dainámie jíáfodo mameina Taife, íemo Satanás, íemo dáamie nana náiraina jífuefiredimie. Afémie naa ie abi imáciari ana éniemo dotácaiaíoi.

¹⁰ Afe méifomo monámona ficírede uaina cacádícue. Afe uai daíde:

—Cai Juzíñamui bínie comini jíllloillena mámiaruiamo ja dúcide. Daje izói íemo ite riino facálliruimo ja dúcide. Iemo daje izói illáimana ie illíruimo ja dúcide. Daje izói ie jító Cristo riire ocuálliruimo ja dúcide. Mei cai ámatiaímo fiénidífue nitáfiredimie ja jino dotácaza. Afémie nágaruillai, mona naíoi diga cai Juzíñamui uiécori afémacimo fiénidífue nitáfiredie.

¹¹ Cai ámatiaí Cordero díedo fiénidífuea anáfenodiaíoi. Daje izói íaíoi jino meáiruiñeno

lloga Juziñamui uáillaído caifófeficaidiaioi, mei jaca tñillana jacíruiñediaioiza; mei jiáifodo jaca tñillemo ñue finóbidaioiza.

¹² Iemona, mona naa afénomo ite cáadinuiairi mai omoi ióbiri. Mei íadi éniemo itino nii dúerena, naa monáillaimo itínuiairi, mei Taife ómoimo ana iere icírillano jáideza. Afémie nano íanori ie íllena onódeza.

¹³ Afe dragón ana éniemo ie dótajana onóillano, nauí íiza jocódingo racade.

¹⁴ Mei íadi afe ringo mena áillue máajaiño íaicona iga, áfedo afe jaio dainámie dragómona jica táizicimo afengo féellena. Afénomo daámani fimona átuedo afengo ecáecaiga.

¹⁵ Iemo jaio dainámie áillue jainoi ie fuémona orede, imánina comúllena, mei afe imánido afe ringo coróbaitallena.

¹⁶ Mei íadi énie ringona ríidote, mei afe dáaruído énie bóccaillano, afe dragón fuémona oreca imánina naítateza.

¹⁷⁻¹⁸ Afe bíemona afe dragón ringomo iere ríicaide. Ríicaillano aféngomona fiébide ie erófene igímaiai diga fuirízaide. Afémaci Juziñamui ocuica uaillai jeire otíaioi. Daje izói afémaci Jesucristo lloga ua ráfuena fáicanocaiñeno nágarui jeire ófirediaioi.

13

Mena áillue jacire eroide rille cíocaide

¹ Monáillai fuédamo cue naidáillano monáillaimona iere jacire eroide rille caifo bíllana cíódicue. Afémie ifo siete dígade, daje izói afémie

diez diga zicairede. Afe illa diga zicaimo illaima jitaracuifo jina. Afemie ifociaimo Juziñamuina fieni daina mameci cueina.

² Afe cue ciona jacirede rille janallarina eroide. Ie idai oso idaina eroina, iemo ie fue león fuena eroide. Bimiemo dragón iemo ite rino naa ie illaillaillano diga afemiemo fecade. Afe llezica riire ocuifirenafue afemiemo lloga.

³ Afe jacirede rille ifociaimona daaci titade áillue boáfena eroide illa. Mei íadi afe titáacade áillue boafe raire jacaide. Iemona nana énie náiraiaí áferi iere jacinaitiaí. Jacinaillano afemiemo innotiaí.

⁴ Afemaci dragón uícomo éniemo fueco diné bíjicaillano iemo caimátaidiaí, mei dragón riire ocuille rino afe jacirede rillemo ígaza. Iemo daje llezica jacirede rillemo caimátaidiaí. Caimátaillano daidiaí:

—¿Bu mei bie jacirede rille izoina? ¿Bu mei afemie diga fuirirena? ¡Afemie anáfenonide! — daidiaí.

⁵ Afe llezica afe jacirede rille afemie úrilla bu llétañega. Iemona Juziñamuina íaire daina uaina llote, naa fieni abi inuafuiaí. Afe izói cuarenta y dos diga fiui, daí ie ocuilla buna ráiruñega.

⁶ Iemona afemie bie izói finode; Juziñamuina uáitano, ie mamecina íaire daííoide. Daje izói Juziñamuimo úriranona íaire daííoide. Iemo monamo itinuiaina daje izói íaire daííoide.

⁷ Iemo jái daje izói Juziñamuimo jaináidino diga ie fuirilla buna ráiruñega. Daje izói afemaci ie

anáfenolle buna ráiruiñega. Iemo nágazie ocuille ríino afémiemo fecaca. Daje izói nana comini jófuiái ócuifireite, íemo daje izói nana jiáifodo úritinuiái ócuifireite, íemo daje izói nana náiraiaina ócuite.

⁸ Nana bíniemo itino afe jacírede ríllemo caimátaidiaíoi. Afémaci mámečiai zlíñona íitino rabénicomo cúeñega. Ua énie taineina llezica baimaci mámečiai afénicomo cúeñega, mei afémaci íinoñena jira. Afénico naui titaca Cordero ie.

⁹ Bífuomo cacáacadimie mai bíemo cácarei.

¹⁰ Jiáimacina maitá uitino méifodo nane maitá uille. Iemo jiái lloéfaido jiáimacina titáidino méifodo afémie daje izói lloéfaido titalle. Mei jira Juziñamuimo jaináidino comécina járidonidiaíoi; daje izói jiái ñue íinorediaíoi.

¹¹ Afe méifodo jiáie jacire eroide rille éniemona caifo bíllana ciódicue. Afémiemo mena zicai ite; cordero zícaina eroide. Mei íadi afémie dragón úrilla izói úrite.

¹² Naui monáillaimona bite nanoide jacire éroide ríllemo ite riire ocuille ríino, daje izói bie méifoidimie ite. Iemo nanoide jacírede rille uícori, bímie íemo ite ríino ácatate. Ie ríino ácata llezica afémie nana éniemo itinuiái, nanoide jacírede ríllemo caimátaillena ocuide. Afe nanóidimie ífomo ite áillue boafe raire jacáidimie.

¹³ Iemo afe méifoidimie daje izói iere jácimie daiítate raana cíotate. Mei uafue, afémie nana comini eróicana monámona iraicí ana éniemo cocítate.

14 Iemo afe nanoide jacírede rille uícomo buna ráiruiñega ie finócaigado nana biniemo itínuiaina jífuete. Afémacina jífuiano afe aillo bofédaite jacírede rillena eroide jánaraina afémacina finótate. Afe bofédaite jacírede rille lloéfaido aillo bofeca, mei íadi nai caade.

15 Iemo afe méifoide jacírede rillemo, afe jánarai cáatalle riino íemo iga. Iemona afe jánaraina cáatano, afémie afe jánaraina úritade. Daje izói nana afe jánaraimo camátaiñedinona afe jacírede rille jánarai íaioiina fatátate.

16 Nana afe baimo, nana náiraiaina bie izói itátate; nana jabóidimaci naa jamánomoidimíiai díga, nana ráaredino naa dúeredino díga, nana ráiruiñegano naa rairuícano díga, íaioi onoi nabézimo daa onótate número jóonetade. Afe onótate número nabézimo jóoneñenia íaioi ozócimo jóonerede.

17 Naga afe onótate númerona cúeñegamie jaca ibárinide, daje izói raana fecánide. Afe número nanoide jacírede rille ie. Afe número afémiemo dúide mámece daíacade.

18 Bifue onóillena iere báitajamo dúide. Afena onódimie, mai afe jacire eroide rille número faca. Afémie número iima ie. Afe número seiscientos sesenta y seis.

14

144,000 dígadino roga rua

1 Afe méifomo Cordero Sión mameina idu emódomo naidáinana ciódicue. Afénomo afémie díga ciento cuarenta y cuatro mil comini

naidáiede. Afémaci ozócimo Cordero mámecei naa ie Moo mámecei díga cúeina.

² Iemo monámona ficírede raana cacádícue. Afe ficírena aillo imánillai nofíco tua ficírena izoide. Jiái riire mona giría ficírena izoide. Iemo jiái aillo arpa dáina, rua roia taiga ráaniai ficírena izoide.

³ Afe llezica illaíma ráirano uícomo afémaci comue rua rotíaioi. Daje izói cuatro díga cáadimíai, íemo éicomíni uícomo rotíaioi. Afe rúana jaca buna ónide. Dani afe ciento cuarenta y cuatro mil díga éniemona jíllode comíni afe rúana onona.

⁴ Afe bimaci ringomo jíriñedino, mei afémaci jaca íaifuenidino; dani íaioi abí rairuídíai. Daje izói afémaci Cordéromo jaináitagamaci. Afémaci comínimona jíllotagamaci, Juzíñamui nanoídino ie dúidímacina íaioi íllena. Daje izói Cordéromo nanoide dúidíno itíaioi.

⁵ Afémaci jaca táinona úriñediaioi, mei afémaci Juzíñamui illáimana ráirano uícori íaifuenino itínoza.

Daámani ángeles daínámaci Juzíñamui abí ímíai llócaiga uai

⁶ Afe mei jiáie Juzíñamui abí ímie mona dáafenedo féiana ciódícue. Afémiemo zíñona jíllollíuai illa, bíniemo itínomo llóllena. Nana énie náiraiáimo llórede, íemo nana jiáiziemo. Daje izói nana jiáífodo úritínomo llórede, íemo daje izói nana comíni jófuiáido.

⁷ Aféme ficírede uaido daide:

—Juzíñamuina ñue omoi jacíruiiri; ñúefuiáina afémiemo omoi nitari, mei aféme iere riire jícanollíruimo ja dúcidez. Mai mona finódimie,

daje izói énie finódime, íemo monáillai finódime, íemo éniemona jainoi jino torano finódime; afémiemo omoi caimátaifireiri, —daide.

⁸ Iemo nane jáie Juzíñamui abi ímie méifodo cíocaide; afémie daide:

—Ja jáicoizite, ja jáicoizite. Afe áillue Babilonia jofue jáicoizite. Mei aillo fiénide jiruífuiái izoide íaifuiái omoi finofirenado, nana nairai jifáidino izói itátatiomoiza, —daide.

⁹ Afe méifodo íraie Juzíñamui abi ímie ficire daífoicaide:

—Dáamie jacírede ríllemo caimátaiai, íemo jái afe jánaraimo caimátaiai, íemo daje izói afe rille mámecei ozócimo ninena ónoimo cuetátaiai,

¹⁰ afe izóidino Juzíñamui lloga jamánomo duere finóllinomo orélliaoi. Mei afe izóidinomo afémie iere rícaide; rícaillano afémie duere íaioi finolle, féñellena riire íaioimo mamécaza. Iemo Juzíñamui abi imaci uícomo, daje izói Cordero uícomo, iraido íaioina iere izi cácatalliaoi. Iemo daje izói nairai iere uzire cónaitalle raado afe izóidinona iere izi cácatalliaoi.

¹¹ Duere íaioi zefuítate irai uíllie jaca ninomo líicaiñeno caifo uillíoide. Afe jacírede ríllemo caimátaítino mona naio diga afe duere finóinamona jaca ócozinaiñeitiaoi. Afémaci naa afe ríllena eroide jánaraimo caimátaidinori, íemo jái ie mámeceina onótate número otino diga nana jaca ócozinaiñeitiaoi.

¹² Mei jira Juzíñamuimo jainaide ie ocuica uaimo jíeruitino, naa Jesudo fáicanocaiñede jáidino diga, comécina járidonidiaoi.

13 Nane afe méifomo monámona daa uai cuemo úrillana cacádícue; daide:

—Bie cúeiri: “Benómona cai Ocuíraimamo ñnote túitino caimare íitiaioi.” Afena Juzíñamui Ñuera Joreño “Jii” dáideza, mei afémaci íaioi táijinamona ocózinaitiaioiza. Daje izói íaioi finócano, jiáima diga nabáirilla izói féitañegaza, —daí daide.

Ria llizilla óina izói, énie comini jofo ollíruimo dúcide, Juzíñamui duere íaioi finóllena

14 Afe mei eróillano úzerede mona ero uílliena cíódícue. Afe uíllie emódomo Nanoide ñima Jitona Jesuna éroidímie ráina. Ie ífomo oro finoina illaíma jitáracuífoi jíina. Daje izói hozna mámecírede arroz izoide llízíe ñetara llíide. (Afe raa jofo icuífoina néfide jáirede lloefai izoide.)

15 Iemo nane jiáie Juzíñamui abi ímie ie gairíracomona jino billa. Afémie ficírede uaido uíllie emódomo ráiidímiena daide:

—O llíiga llízíe ñetara raado táijiri. Ja jeede diga mai jofo ono. Ja jofo ollíruimo dúcideza. Enie comini finócafuiái ja jeede ríaniai izói fiénidífuenta iere oruídeza, —daide.

16 Afe mei uíllie emódomo ráiidímie ie llíiga llízíe ñetara raado énie comínimo táijizaide. Afedo fiénidífuenta oruídino jofo ote.

17 Afe mei jiáie Juzíñamui abi ímie monamo ite Juzíñamui gairíracomona jino bite. Daje izói afémie jáirede llízíe ñetara raa llícabite.

18 Afe llezica jiáie Juzíñamui abi ímie Juzíñamuimo caimátairanomona jino bite. Afémiemo jobáitale

ríinona ite. Iemo afémie, jáirede ñetara raa llíidimiena ficire jírillano daide:

—Mai omo ite jáirede ñetara raado táijiiri; éniemo ite jíricoillai ollíruimo ja dúcidez. (Afe jíricoillai fiénide comini jana.) Mai jofo ono, mei afe jíricoillai ja iere jiduúdeza, —daide.

¹⁹ Iemo afe jiáie Juzíñamui abi ímie, ie jáirede ñetara raado énie comínimo táijizaide. Afedo éniemo ite jeede jíricoillai izoide fiénidino jofo ote. Uano áillue iduíriraco izóidinomo jofo dite, afénomo riire iduúllena. Bie iduilla Juzíñamui bie izói duere afémacina finolle jana.

²⁰ Afe jíricoillai izoide fiénidino áillue comini jo-fue jinomo iduica. Afe iduíracomona aillo díena tote. Afórede imani izoide; áfeji caballo táia ie fue illa dinori afórede. Daje izói áfeji trescientos kilómetros dinó tote.

15

*Iraie siete dígade jacírede duere fnóllifui*ai*
Juzíñamui abi imaci mameca*

¹ Iemo monámona jiáie jacínaitade áillue raa jánana ciódicue. Siete dígade Juzíñamui abi imaci íraie siete dígade jacírede duere finóllifui*ai* lluáíbitiaíoi. Afedo Juzíñamui ríicaillana záate.

² Daje izói, vídriona finóinana eroide monáillajina ciódicue. Afeji réici díga taméricaide; daí eroide. Jacírede ríllena anáfenodino afe fuédamo naidáiediaíoi; daje izói ie jánaraina anáfenodino; íemo jiái afe ie número mámecina ozócimo cúeñegano díga. Nana dáanomo afe vídriona eroide

monáillai fuédamo naidáiediaioi. Nana bimaci Juzíñamui íaioimo fecaca ‘arpa’ daina rua roia taiga raa llíedíedíeioi.

³ Afémaci Juzíñamui jaiái ocuífíregamíe Moisés rua rotíaioi. Daje izói jíái Cordero rua rotíaioi. Aférúa bie izói daide: Ocuíraíma, nana o finócanuíai íere ebíriede. Jamánomo ríinorede Juzíñamuidío.

Náiraíai Illaíma, nana o jáifírena ío uáfúena jáícina jóide.

⁴ Ocuíraíma, ona ñue jácíruiñeitímíena íñede. Daje izói omo ñúefúena jóoneñeitímíena íñede.

Mei dama o íaífuenidímíenaza.

Naga náiraíai omo caímátaízaíbítíeioi, mei o jáícina finófíregafuíaina cíódíeioíza.

Aquíe izói rotíaioi.

⁵ Bie méífodo, monamo íte Juzíñamui gairíraco tújicaillana cíódícue. Afeco nofíbícimo cuega Juzíñamui ocuica uaillai éenorano.

⁶ Afécomona Juzíñamui siete dígade abí imaci jino bite. Afémaci siete dígade jacírede duere finóllífuíai uite. Afémaci ráífíde íáíníde queníredícuiruí jíotáoidíeioi. Íaíoi llaitáíga oro finoina círaígí ífe jogóbemo dúcíde.

⁷ Íe mei cuatro dígade cáadímííamóna dáamíe afe siete dígade Juzíñamui abí ímácímona ílla dígamíemo oro finoina íchecoí fecade. Aféchécoí jaca nínomo zíñóna íte Juzíñamui ocuica duere finóllífuena oruíde.

⁸ Íemo afe Juzíñamui gairíraco uíllíena oruíde. Afe uíllíe Juzíñamui jamánomoidímíena íllamóna, daje izói íe íere ríinorenámóna comuíde. Afe

llezica afécomo buna jofo jáinide. Nai afe siete dígade Juzíñamui abi imaci siete dígade jacírede duere finóllifuiái záíñena llezica buna jofo afécomo jáinide.

16

Juzíñamui duere finóllifuená oruide ichécuai

¹ Afe mei Juzíñamui gairíracomona jino bite ficírede uaina cacádicue. Afe uai siete dígade Juzíñamui abi imácina daide:

—Juzíñamuimona bite siete dígade duere finuana oruidichecuai ana éniemo tótaji, —daide.

² Nanoide Juzíñamui abi ímie jaillano, afémiemo ite ichecoí ana éniemo totade. Afemona nana jacírede rille mámecina cuezánomo jacírede duico comuide. Afémacimo izírede jállotañede ñozagi izoide duico comuide, daje izóí afe rille jánaraímo caimátaifiredinomo.

³ Iemo méifoide Juzíñamui abi ímie afémiemo itíchechoí monáillaimo totade. Tótamona afe monaillai jáinoi tídimie die izóí jaide. Iemona nana monáillaimo ite cáadinuiai tícoizite.

⁴ Iemo nane jáíie Juzíñamui abi ímie afémiemo itíchechoí imánillaimo, daje izóí éniemona jáinoi jino toránuaímo totade. Iemona afeno jáinoillai díena jaide.

⁵ Afe mei jáinoi fiene finótate Juzíñamui abi ímie dáinana cacádicue; daide:

—Ocuíraíma, íaifuenide Juzíñamuidio. Bie izóí comini duere o finóllena iere comécina jáícina jóidimiedio.

6 Mei omo jaináidinona títano íaioi díena naui totádiaoiza. Daje izói o dibénedo úritino díena totádiaoiza. Iemo birui afe ibana o afémacina díena jirótatio, mei daí afémacimo dúideza.

7 Afe mei nane Juzíñamuimo caimátairanomona dámie dáinana cacádicue; daide:

—Jii, uáfueza, cai Ocuíraima, o jamánomo riírede Juzíñamuidio. Uáfuena ñue jaícina iere riire jicánotio, —daide.

8 Ie mei nane jiáie Juzíñamui abi ímie afémiemo itíchechoi jitómamo totade. Afemona afe jitoma comini cóonaitalle riino iga.

9 Iemona nana comini jamánomo cóonaizítiaioi. Mei íadi íaioi comeci itífuiaina méidoñediaioi. Daje izói Juzíñamuimo caimátaiñediaioi. Mei jiáifodo afe jacírede duere finóllifuiái ocuídimiaena faidófirediaioi.

10 Iemo nane jiáie Juzíñamui abi ímie afémiemo itíchechoi jacire eroide rille illáimana ráiranomo totade. Afe llezica afémie náamataga illano jítirecaide. Iemona nana comini afe uícodo íaioimo comuide duícuai izírenari daní abi ainízítiaioi.

11 Mei daí itíaioi íadi, íaioi finoca fiénidifuiái fáicanocaiñediaioi. Mei jiáifodo, izi íaioi cácana ícoinia, daje izói jacire íaioi ñozánaillamona, monamo ite Juzíñamuina íaire daidíaioi.

12 Iemo nane jiáie Juzíñamui abi ímie afémiemo itíchechoi áillue Eufrates mámeçirede imánimo totade. Afemona afe imani zafénaite, áfedo illaini raire ruica bille io tuiñóllena. Aféllaini naa íaioi fuirírainiri jitoma caifo biránomona bitíaioi.

13 Afe mei dragón dainámie fuémona, daje izói jacire eroide rille fuémona, daje izói taino uai jino llófredimie fuémona daámanide cúuraicina eroide fiénide jóriai jino bíllana ciódicue.

14 Afe daámanidino Taife jóriai. Afémaci ciórainina raana ciotafiredino. Bie damieámanidino nana énie illaini naa íaiói fuirírainiri dáanomo gairítaite, jamánomo riinorede Juzíñamui diga fuiríllena. Aferui Juzíñamui aillo iba ollirui.

15 Aféruido monámona Cristo úrillana cacádicue; daide:

—Ero, cacai. Merírizaibitimie billa izói, comini nai cuemo coméciñediaioimo déizaibiticue. Cue bille llezica iníñeno cuemo comeci facáoidimie caimare íite. Daje izói emuíroma mácañeillena iníroina ñue úiñotimie izói, íaifuemona abina ráiruitimie méairuiñeite, —daide.

16 Iemo afe daámanide fiénide jóriai, nana illáinina dáanomo gairítate. Afeno mámeçi hebreo uaido daina Armagedón.

17 Iemo siete dígademona íraie Juzíñamui abi ímie afémiemo itíchecoí caifo táifomo totade. Tota llezica monamo ite gairíracomona ficírede uai cácaaide. Afe uai illaíma ráíiranomona jino bite; daide:

—Ja fuite, —daide.

18 Afe méifodo, améuai llairilla. Mona gírta naa ficíriede ráaniai diga cácaaide. Afe llezica énie iere riire docaide. Nanómona bíniemo comini ia docáifirena baímo, jamánomo riire docaide.

19 Iemona afe áillue comini jofue daámani dieze bójicaide. Jíáie bíniemo ite jofue jáicoizite. Afe

llezica Juzíñamui áillue Babilonia jófuemo úbicaide, duere íaioina finóllena. Afe duere finóllifue comini títate ríiji jírúa izói íte. Afémie ríicaillano daí íaioina fínoite.

²⁰ Afe dáaruido nana monáillaji cigi íduai naa jíaie caifóneduairi niné táinocaide.

²¹ Afe llezica aillo jéerie nocíjiaina monámona comínimo cocide. Aféjiaimona dáarie cuarenta kilos méereede. Iemona afénomo ite comini afe áillue nocíjiaí cóciari Juzíñamuina íaire daídíaioí, mei afe bimaci duere fínua iere jamánomoideza.

17

Jamánomo jirúredingo duere finóinafue

¹ Afe méifomo siete dígachecoí llíide Juzíñamui abí imácimona dáamie cuemo úrizaibite. Cuenadaide:

—Eróizaibi. Jamánomo jirúrede izoide íaifueredingo duere finóinana omo ácataitícue. Afengo monáillajillaimo ite. Afe bie izói daííacade aillo nairai afengo anamo itíaioí.

² Bínie illaini afengo díga aillo fiénide íaifuiái finófirediaioí. Iemo bínie comini afengo íaifuerenamona jífaífredino izói íaire jáidiaioí, —daide.

³ Afe mei Juzíñamui Ñuera Joreño nicáirilla izói cuemo ácataja llezica, daa Juzíñamui abí ímie táizicimo cue uite. Afénomo daa ringo jáirede jacire eroide rille emódomo ráinana ciódicue. Afe ríllemo díga Juzíñamui íaire daína uaillai cúeina. Afe rille siete díga ífócirede, daje izói afémie zicai diez dígade.

⁴ Afe ringo jitáoigacuiro jáiirede, íemo morádoná eroide. Afengo oro finoína íena ebire finóbide, íemo ráifide ñue finoca nofíciaina, íemo ‘perla’ dáina zíriona finóbide. Iemo afengo oro finoína ichecoí llíide. Aféhecoí íáirede raana oruide, íemo jáí afengo jiruírena llezica finoca íaifuiaina oruide.

⁵ Afengo ozócimo cuetá jónega ónonide mámece illa. Afeci bie izói daide: “Aillue Babilonia jofue, nana fiénidifuiái jillaci, aféfuíái ei dáina izói mameide. Iemo nana bíniemo ite éoigafuiái ei dáina izói mameide.”

⁶ Iemo diga Juzíñamuimo jáináidino afe ringo ícoína fazícaiaíoi. Afémaci Jesús uai llócaína jira afengo titácaiaíoi. Iaiói fazícanori afengo, come jifáifirena izói, iere ióbide. Afena cíollano iere jacire fáigacaidícue.

⁷ Ie jira Juzíñamui abí ímie cuena daide:

—¿Minícarí jacínaitio? Afe ringo ónonino daííacanafue jino omo onótaitícue. Daje izói afengo uífirede jacírede rille maméinafuena omo onótaitícue. Afe rille ifo siete dígade, íemo diez diga zícairede.

⁸ Afe o ciona jacírede rille jaiái nino itímie, mei íadi ie tílla mei jae íñede. Mei íadi afémie íraicaiño ie tílle uícodo meine abido fiénide jóriái íbáirafomona caífo biite. Mei íadi billano zíñona ie duere finóllinomo orelle. Eniemo ite comínimona zíñona ille rabénicomó énie táineína llezica mámeceína cúeñegano, afe rillena cíollano iere jacínaficaitiaíoi, mei afémie jaiái íteza, íemo biruí jae íñédeza, íemo meine abido uire bíteza.

9 Birui cai uaina féiruiñedinomo nai benó jiáie llollífuena ite: Cácarei. Afe siete dígade ifóciai baie ringo ráina siete dígade caifóneduai jana.

10 Iemo afe llezica afe siete dígade ifoci daje izói siete dígade illaini jana. Afe siete dígade illáinimona cinco diga ja dotácaiaioi. Afe mena fiébidemona daa nai illáimana ite. Iemo jiáimie nai illáimaizabiñede. Afémacimona íraillaíma bíadi are iñeno táinocaite.

11 Naui caade íocirede rille, tíide íadi, nane birui caade illaíma. Afémie siete dígademona afémaci emódoidillaíma. Mei íadi afémie siete dígademona dáamie. Afe mei afémie íraicaiño ie tíillinomo jáite.

12 Afe o ciona diez dígade zicai, diez dígade nai illáinina jáiñedino jana. Mei íadi jacírede rille diga dáaruído afémaci nano íanori dieze illaini ocuífirena ríino llínoitiaioi.

13 Bie diez dígade illaini conímamo daje izói comécidiaioi. Iemo íaioimo ite ocuille ríino jacírede rillemo fécaitiaioi.

14 Iemona Cordero daina Jesucristo diga fúiritiaioi; mei íadi Cordero íaioina anáfenote. Mei afémie nana ocuídinomona Jamánomo Ocuídímieza. Daje izói afémie nana illáinimona Jamánomoidillaímaza. Afémie diga jáicadino Juzíñamui nizeda jírigano. Daje izói afémaci fáicanocaiñeno Juzíñamuimo ñue íinofiredino, — daí afémie cuena daide.

15 Juzíñamui abi ímie nane dáanomo cuena daide:

—O ciona monáillajillai, ñi afe íaifueredingo illano, afe monáillajillai aillo jófueniaí jana. Daje izói

aillo comini jana, íemo jiáiforie úritino jana, íemo aillo náiraiaí jana.

¹⁶ Jacire eroide ríllemo o ciona zícainiaí jiáie illáimaiaí jana. Afémaci bie jiruíredingona éoitiaíoi. Eoillano aféngona zóofeitiaíoi, íemo jiái aféngona emuírogi óreitiaíoi. Afe mei afengo íeizina ríitiaíoi. Iemo jiái aféngona iraimo cóonaitaitiaíoi.

¹⁷ Juzíñamui comeci jítaina izói afe ringona duere íaíoi finóllena ónonino íaíoi comécimo úrite. Ie jira dájena comécidiaíoi íaíoi mo ite jacire ocuille ríino jacírede ríllemo fecállena. Iemona afémie jamánomo ríirede. Daí Juzíñamui daina uáillaina fuillíruimo dúcia llezica finófrediaíoi. Iemona afémie daina uaina ñue ícoimo záitatiaíoi.

¹⁸ Afe nauí o ciona jiruíredingo, nana énie jamánomo ocuífiredillaíma illágobe jana, —aquíe izói daíde.

18

Babilonia jofue táinoicailla

¹ Bie méifodo monámona jiáie ángel dainámie, Juzíñamui abi ímie ana bíllana ciódicue. Afémie aillo ríino diga bite. Afe llezica ie quenire bóodedo bínie egáínote.

² Afe llezica afémie ficire úrite; daíde:

—Aillue Babilonia jofue ja jáicoizite, ja táinoicaide. Taífe ocuífiregano illánona jaide. Daje izói nana jiáiforiede íáirede jóriaí uíñoracona jaide. Afe izói nana íaire féedino jilláillinona jaide, naa jiái cai éoiga féedinuiaíri.

³ Mei aillo fiénide íaífuaí afengo finófirenado, nana nairaí jifáidino izói itíaíoiza. Iemo naga énie

illaini afengo diga aillo jiruifue izoide íaifuiaina finófirediaoi. Biniemo ráaniai fecáfiredino iere úcuberedinona jáidiaoi. Mei uafue, afe áillue jofue comini izire jicaca táinomo faitátate ráaniai íaioi jicáfirenamona bimaci aillo úcubenaiddiaoi.

⁴ Afe mei monámona jáie uaina cacádicue; daide:

—Omoi cúeiediomoi za bie jófue mona oni omoi jai; íaioi finoca fiénidifue afémaci finua izói omoi fiñoñelleza. Daje izói íaioimo zúite jaciredifuiái ómoimo jíriñelleza.

⁵ Mei afémacimo ite fiénidifuiái ofilla ja monamo dúcidez. Íaioi finoca fiénidifuiáimo Juzíñamui ja uíbicaidez.

⁶ Iemo Juzíñamuina daide:

—Jiáimacimo íaioi feca izói, afe izói íaioimo fecari. Íaioi fiéni finua izói, afe baímo ménacaiño afémacimo finori. Afémaci ñúemacimo eriredena jóoneta jirota izói duere íaioina finódiaoi. Afe íaioi finua izói, afe íbana ménacaiño afémacimo riire duere íaioina finori.

⁷ Aillo táinodo abi íaioi ínua dieze, íemo cómena canóñedemo fáififirena dieze, áfeze afémacina duere finori; afe izói íaioina duere zefuítari. Mei bie ringo izoide jofue comini afengo ie comécido daífiredeza: “Benomo illáingona ráidicue. Jaca fécinaiñeiticue; jaca dúeniticue,” —afengo daide.

⁸ Ie jira bie izói úrillamona, dáaruido omo dúide jaciredifuiái cómuite: tilla íemo duere zefuilla, íemo júbie. Iemo iraimo cónaitio. Mei o duere finótate Juzíñamui jamánomo ríinoredeza. Afémie jaca cai Ocuíraima.

⁹ Afengo diga jiruúrede bínie illáicomini, daje izói afengo diga cómena canóñedemo fáifidino aféngori iere éenaitiaioi. Mei uafue, afengo cónailla uílliena cióillamona aféngori cáillicailli éeitiaioi.

¹⁰ Afengo iere duere finóinari jacinaillamona oni jica ítiaioi. Afemona dáitiaioi:

—¡Aii, nii o dúerena! Jamánomo ríirede Babilonia jófuedio, jnii duere o zefuilla! ¡Mei raire dáaruido o duere finoína comuúbicaide! —dáitiaioi.

¹¹ Bínie ráaniai fecáfiredino aféngori cáillicailli éenaitiaioi, mei ja íaioi atica ráaie íbaitino iñede.

¹² Iaiói atífirega ráaniai, be nñe: Oro, plata, ráifide nofciaí, ‘perla’ daina ráifide zírío, ráifide úzecuiro, íemo jáirede ‘sédacuiro,’ morádoná eroide seda diga, íemo jáíi diga jááfodo zióriede aménaiaí, íemo ebírede ‘marfil’ daina elefante zicaí finoína ráifide raana, íemo ráifide amena finoína raa, íemo ‘bronce’ daina borárede lloébici finoína raa, íemo jamái lloébici finoína raa, íemo ‘marmol’ daina nofcici finoína raa,

¹³ daje izói ‘canela’ daina güíllemo faíga raa, íemo jáíiforie ráifide ziórede raa, íemo ziórede uguci, íemo ‘mira’ daina ziórede raa, íemo come abi jilláiraniaí, íemo ‘vino’ daina jiróraji, íemo cáirediji, íemo ñuera pan finófirena harina, íemo trigo, íemo daje izói abífirede cáadino, íemo ovéjaiaí, íemo cabálluai, íemo ‘carros’ daina arínellaiaí, daje izói jacire rairuica comínina fecádiaioi. Bie izói daina cáadino iima ringo diga jáíimacimo fecádiaioi riire íaioi ocuúllena.

¹⁴ Afe jofue comínina dáitiaioi:

—¡Baie omoi gaíga caimárede amena llizíllaniaí

izoide ráaie jae iñede. Nana omoi ofítaga ebíriede ráaniai ja táinocaide! —dáitíai.

15 Afe ráaniai fécajano iba úcube ófiredino bie áillue jofue comínimona otíai. Uano aillo úcuberediaí. Mei íadi aféruido afe jofue iere duere finóinari jacínaillamona oni jica íitíai. Afénomona aféngori cáillicaili éeitíai.

16 Iemo dáitíai:

—¡Aii. Aillue jófuedio nii dúerena! Naui ñuera ráifide úzecuro jítádingo izóidio. Daje izói o comini jáirede ráifide iniroi, íemo morádona eroide ráifide iniroi jítáfirediaí. Afe llezica oro íena finóritíai; daje izói ráifide nofici finoina raana finóritíai, íemo jái ‘perla’ daina zíriona jítáfirediaí.

17 Iemo dáaruído naado aillo ráaniai niné táinocaide.

Daje izói nana ‘barco’ daina áillue nocáe ocuídillaini, naa afécaedo jáidino diga, áfena jacíruillano oni jícarié itíai; daje izói afécaedo táijidinori naa jáífodo monáillajimo táijide comíniri oni jícarié itíai.

18 Iemo afe jofue bóua úlliana cióillano caillídíai:

—Bie izoide naui áillue jófuena, ¿Ninomo cíoitícaí? Bie izoide jofue jaca íñeite, —daídíai.

19 Iere zúucaillano íai ifomo énie júdaídíai. Daí ñiano cáillicaili éedíai. Daídíai:

—¡Aii! ¡Aillue jofue nii dúerena! Nana monáillajido ráaniai fecáfiredino afe ráaniai o comini úamona afémaci aillo úcuberediaí. ¡Mei íadi dáaruído afe áillue comini jofue ja niné táinocailla! —daídíai.

20 Afe mei áfena ciódime daide:

—Monamo itínuiái, mai afe áillue jofue táinocaillari omoi ióbiri. Uáfueza, Jesucristo orécano, naa Juzíñamui dibénedo úritinori mai ióbiri, naa Juzíñamuimo jaináidino diga. Mei Juzíñamui afengo niné táinocaitajado, omoi duere zefuítaja ñue jaícina iba ote, —daide.

²¹ Afe mei riírede Juzíñamui abi ímie áillue nofici caifo raiñode. Afeci áillue ‘molina’ daina trigo llaira mérede nofici finoina eroide. Caifo ráiñuano afécina monáillajimo dotade. Dótajano daide:

—Afe bie izói áillue Babilonia jofue ana cáicoizite, íemona jaca ninomo meine cíoiñeille.

²² Benómona jaca o cígido joide iomo ‘arpa’ daina rua roia taiga raa rúaniaina meine cácaiñeille. Daje izói totíbacui uai naa bainada uai diga ja meine cácaiñeille. Afe izói nana jíáiforie táijiana baitáinomona buna fiébiñena. Iemo daje izói dobérilla ficírena izói ‘molina’ daina nofici uaina cácaiñeille.

²³ Afe daje llezica o jófuiái eromo bóofirede mechera izói boode ráaniai abido bóoiñeite. Iemo aféruimo áirena llezica iráizie caimare ficirerie íaiói úrilla uáillaina meine jaca cácaiñeille. Mei nauí omo ite ráaniai fecáfiredino bínie comínimona jamánomoidiaíoi íadi, ja birui afe caimárede uailai cácaiñeille. Nauí aféruimo aima bífuefirena uai izóidedo náiraiaina jífuefiredio; mei íadi afe jífuefirena ona nabáiñede.

²⁴ Mei uafue, afe o jofue cígimo Juzíñamui dibénedo úrifiredino díena ciona. Daje izói Juzíñamuimo jaináidino naa jíáie bínimo fagano

díena afénomo ciona. Afe ciona die, afe jofue comini jiáimaci títaja ícoinia daí illa jana, —daide.

19

¹ Afe bie méifomo monamo ite aillo comini ficírede uáillaina cacádícue. Daidíaiói:

¡Aleluya! Cai jíllonano cai Juzíñamuimo dúide.

Daje izói iere ebíredí fue afémiemo mamérede, íemo naa ñuera ríino diga.

² Mei afémie ñue jaícina ua uaido iere riire jicánofiredeza.

Afe iere jiruíredingona afémie riire duere finótateza.

Afengo iere ie jiruírenado énie comínina íaire finode.

Juzíñamuimo táijitagano tilla iba aféngomo oga, daidíaiói.

³ Nane dáanomo daidíaiói:

—¡Aleluya! mei afengo jobailla uíllie jaca ninomo líicaiñeno uillíoite, —daidíaiói.

⁴ Afe lezica veinticuatro dígade éicomini, íemo jiái cuatro diga cáadimíai diga, ana éniemo bíjicaillano, Juzíñamuimo caimátaidíaiói. Illaíma ráíranomo ráide Juzíñamuimo caimátaillano daidíaiói:

—¡Daiítadeza! ¡Aleluya! —daidíaiói.

⁵ Nane afe mei illaíma ráíranomona jiáie uaina cacádícue; aféuai daide:

—Cai Juzíñamuimo nana afémie ocuícano afémiemo ñúefuíai omoi mameri. Daje izói íena caimare jacíruitino, illáicomini naa jiba comíniri, ñúefuíai afémiemo jónefireiri.

Cordero daína Cristo áirena rafue

⁶ Nane daje izói aillo comini uaillai izóidena cacádicue. Afe uaillai aillo imánillai ficirena izói ficirede, íemo jái afe uaillai ficire mona gíria ficirena izói ficirede. Afe uaillai daide:

¡Aleluya! Jamánomo riirede cai ocuide Juziñamui nane meine como ócuite.

⁷ Mai cai ióbilli; daje izói iere caimare cai illi.

Afémiemo ebíredifue cai mamelli.

Mei Cordero áirena izóidiruimo ja dúcidez.

Afémie ai izóidinona jáitino ja ñue finóbidiaioi.

Afémaci Crístimo ua ínotimaci.

⁸ Ráifide úzecuirona jitárediaioi.

Mei uafue, íáinino quenírediroi Juziñamui afémacina jitátaga.

Mei afe ñuera ráifide úzecuiro Juziñamuimo jaináidino comécina jáicina jóoina jánaza.

⁹ Iemo Juziñamui abi ímie cuena daide:

—Mai cúeiri: Cordero áirena ráfueмо uáidogano ja caimare itíaioi, —daide.

Nane cuena daide:

—Bíuai Juziñamui lloga ua uai, —daide.

¹⁰ Iemona afe Juziñamui abi ímiemo cue caimátaillena ie anamo dújudicue. Mei íadi afémie cuena daide:

—Cuemo daíí iñeno, mei o izói cue Juziñamui ocuícamiedicueza. Jii, Jesús llócaiga ua uaimo féitañeno ínote o ámatiai izóidicue. ¡Cuemo caimátaiñeno; Juziñamuimo cáimatai! —daide.

Mei afe Jesús llócaiga ua uai, Juziñamui dibénedo lloga uaillai jino llotino comeci úritade.

Uzere de cabállomo ráicaidimie

11 Nane afe méifomo mona tuíñuana ciódicue. Afénomo úzerede caballo cíocaiide. Afe emódomo ráiicaidimie mámecei “Fiel” íemo jíái “Verdadero” dainámie. Mei afémie ñue jaícina illáfuedo ocuúdeza; daje izói áfedo fiénidino diga fuirítateza.

12 Ie ui irai bóua izói quere cíoide. Ie ifócimo diga illaima jitáracuifoí jitáoiide. Daje izói afénomo dama ie onoiga mámecei cúeina.

13 Afémie jitácacuiro díemo mutácaroi. Afémie mámecei Juzíñamui Uai.

14 Afe llezica nana monamo ite Juzíñamui ocuica fuirídino afémie óodana jáidiaioí. Afémacei ráifide úzecuiro jitáoidiaioí. Aferoi jaca íáinide. Baie nana afémiedo jáidino úzerede cabállomo ráiicaidiaioí.

15 Afémacei ifódimie fuémona jáirede lloefai jino bite, áfedo nana nairai boféllena. Afe llezica afémie lloébicí izóidedo náiraiaina ócuite. Vino finóacanomo úvaiaí iduállena riire záizía izói, afe izói afémie afémacimo iere riire jicánoite. Iemo jamánomo ríinorede Juzíñamui ríicaillamona cómuite iere duere finóillifue, vino jirótaja izói afémacina duere finótaiteza.

16 Ie inícuiro emódomo jitácacuiromó cueba mámecei illa. Daje izói ie riáizimo cueba. Afeci daide: “Nana illáinimona Jamánomoidillaima,” íemo jíái “Nana Ocuídinomona Jamánomo Ocuídimie.” Afémie ñi cai Ocuíraima Cristo.

17 Afe mei Juzíñamui abi ímie jitoma riire egáiñuonomo naidáinana ciódicue. Afémie nana mona erodo féedinuiaí ficire jírrite; daide:

—Juzíñamui finoca áillue güille nana dáanomo omoi riáibi,

18 mei benomo illaini íeizi ríitiomoiza, naa fuiríraini illáicomini íeizi diga. Dáanomo íocirede fuirífredino íeizi ríitiomoi, naa caballo íeizi diga. Daje izói afe emódodo ráicaidino íeizi ríitiomoi. Iemo nana fiébidino íeizi ríitiomoi. Buna ráiruiñegano, daje izói jacire rairuícano, íemo jiái jamáimaci íeizi, naa jamánomoidimaci diga daje izói ríitiomoiza, –daide.

19 Afe mei afe jacire eroide ríllena ciódicue naa bínie illáicomini naa íaioi fuirírainiai diga. Nana bimaci fuiríllena dáanomo ofidiaioi. Afémaci afe úzerede cabállomo ráicaidimie diga fuirízaibítiaioi. Afémie “Juziñamui Uai” dainámie. Daje izói afémie canode fuiríraini diga fuiríllena maméritiaioi.

20 Afe mei afe jacírede rille, taino uai jino llócaidimie diga ja llaveca. Afe taino uai jino llotímie, jacírede rille eróicana, jacínaitade ciórainina raa ciótate. Aféfuiaido afe taino uai jino llotímie, nana afe jacírede rille mámecina cuetátaganona jífujete. Daje izói afe jacírede rille jánaraimo caimátaidinona afémie jífujete. Iemona ‘monstruo’ daina jacire eroide rille, daje izói taino uai jino llotímie, cáanori dáanomo duere finolle jorai izoide bóodimo dotácaiaillinoi. Afe jorai izoide duere finóllino íere uzire boode.

21 Nana áfemona fiébidino úzerede cabállomo ráicaidimie fuémona bite lloéfaido titácaiaioi. Iemona nana féedinuiai bie titácano riábillano íaioi íeiziri jéirediaioi.

20

Mil diga fimona dino comini caimare íitiaioi

¹ Bifue méifomo ángel dainámie Juziñamui abi ímie monámona ana bíllana ciódicue. Afémie afe fiénide jóríai íbáirafo zuitara llave naa áillue llojeo diga llíicabite.

² Afe bie Juziñamui abi ímie ‘dragón’ daina jáiaira áillue jaio lláitano anáfenode. Afe jaio jáífodo mameina Taife, dáamie Satanás. Anáfenuano afémiena mil diga fimona llaveca.

³ Ana fiénide jóríai íbáirafomo óriano íena llavede. Lláviano afe nazemo ‘sello’ daina “buna zuitánide” daide raa jónete. Daí finoca náiraiaina mil diga fimona dinori jífueñeillena. Afe mil diga fimona jaille méifomo, afémie nano íanori zuitalle.

⁴ Afe mei illaíni ráiiranuaina ciódicue. Afénomo ráiiedino iere riire jícanolle riinona igáiaioi. Afe dáaruido ífóciaina jáicoicano coméciaina ciódicue. Afémaci Jesús jáicina lloga Juziñamui uai íaioi llócailla ícoinia ífócina jaitácaiaioi. Afémaci afe jacire eroide ríllemo caimátaiñediaioi; daje izói afe jánaraimo caimátaiñediaioi. Daje izói afémaci ozócimo ie mámecei cuetátaiñediaioi, íemo daje izói íaioi ónoimo. Afémaci abi meine abido cáaillano mil fimona dino Cristo diga illáimaitiaioi.

⁵ Afe bie meine abido cáadino, nanóidino meine cáailliruimo abido cáaitiaioi, jae cai daina Cristo diga illáimaillena. (Mei íadi jáíe tíidino mil diga fimona záíñena dino meine abido cáaiñeitiaioi.)

⁶ Nana afe nanoide cáailliruimo meine abido cáaitino caimare ítiaioi. Daje izói afémaci Juziñamui ñue finócano. Afe meífoide tulle afémacimo jaca jíriñeite. Mei íadi afémaci comínido Juziñamuimo úrifireitínona ítiaioi; daje izói Cristo íeiena zííñona

ítiaioi. Iemona mil fimona dino afe Cristo diga illáimaitiaioi.

⁷ Afe mil diga fimona záilla méifomo, Taife ie llavéinafomona zuitalle.

⁸ Jáillano nana énie náiraiaina jífueite. Aféruido “Gogna” mámecirede náiraina jífuaite, “Magog” daina náiraina diga. Afe náiraiái fúritinuiaina Taife dáanomo jofo óite, íraicaiño fuirílle. Afémaci monáillajimo ite guamai dígadeza facádonidiaioi.

⁹ Afemona énie nániena afémaci iere oruíbicaite. Iemona Juzíñamuimo jaináidino illánona nágafene fállena cirínotiaioi. Afe illano Juzíñamui izíruiga Jerusalén daina jofue; áfena cirínotiaioi. Mei íadi Juzíñamui monámona irai afémacimo orede. Afe iraido fiébiñeno cóonaitiaioi.

¹⁰ Afe llezica afémaci jífueoicaide Taife boode jóraimo dotaca. Afe jorai iere uzire boode. Afe dáanomo jacire eroide rille, íemo jíái taino uai jino llócaidimie nauí dotaca. Afénomo mona naio diga jaca ninomo ziiñona iere duere finócaiaioi.

Aillue úzere de ráirano illaíma ie, íemo afe uícomo iere riire jicánollino cioina

¹¹ Afe méifodo áillue úzere de ráirano illaíma íena ciódicue. Íemo afénomo ráiidimiena ciódicue. Afémie uícomona nana énie mona diga niné cióbicaíñena. Afe mona énie diga illino jae íñede; jae niné táinocaidiaioi.

¹² Daje llezica Juzíñamui uícomo nauí Juzíñamuimo íinoñeno tíidino naidáienana ciódicue. Afeno jamánomoidinori naa jamáimaciri dáanomo naidáiediaioi. Afe llezica comini finócafuaí cuiánicuaí túide. Daje izói afénomo jíáie ziiñona

ítino mámeçi cuiánico túide. Bie tíidino íaiói finócafuiái íllaze riire jicánogaiaíoi, mei afe íaiói finócafuiái cuiánicomó cúeina dieze riire jicánogaiaíoi.

¹³ Afe llezica monáillajimo báide tíidino meine abido Juzíñamui uícomo caifo náidacaitagaiaíoi. Daje izói nana jiaíforie tíidinuiái íaiói tíillanomona meine abido Juzíñamui uícomo caifo náidacaitagaiaíoi. Afe nana náidacaitagano íaiói finócafuiái íllaze afémacimo riire jicánogaiaíoi.

¹⁴ Afe mei ‘muerte’ daina comini tíillafue boode jóraimo dotaca, ie mei niné táinocaide. Daje izói dáanomo nauí tíidino íbáinaco afénomo dotaca. Dotaca mei niné táinocaide. Afe bie boode jorai, íraie tíillana mameide.

¹⁵ Iemo afe ziiñona itino mámeçi cuiánicomó mámeçina cúeñegano afe boode jóraimo dotácaiaíoi.

21

Comue mona comue énie diga

¹ Afe méifodo comue mona, comue énie diga ciódicue. Mei nanoide mona nanoide énie diga ja niné cióbicaíñenaza. Daje llezica monaillai jae íñede.

² Afe llezica comue Jerusalén daina íaífuenide jofue, Juzíñamui uícomona monámona ana bíllana ciódicue. Afena ciódimiedicue, Júaadícue. Afe jofue, óllena jicánoga ringo ebire finóbina izói ebire cíoide.

³ Iemo monámona ficire dáinana cacádicue. Afe uai daide:

—Ero, comini cígiri birui Juzíñamui illa. Afémaci diga ífireite, íemo afémaci afémie comínina íitiaíoi.

Ja birui dama afémie afémaci cígiri lite, afémaci Juzíñamuina ie íllena.

⁴ Juzíñamui afémaci ui jémene zafénaitaite. Aféruimo tílle íñeite. Daje izói eia íñeite, íemo jiái duere zefuíllamona eia íñeite. Daje izói comini abi izírena íñeite, mei jaiái itífuiái jae záaideza.

⁵ Iemo illaíma ráíiranomo ráíidímie cuena daide:

—Ero. Nana cómuena méidotícue.

Iemo nane daide:

—Bie uai iere ua uaiza, mai cúeiri. Daje izói bie uai iere ínofiregaza, —daide.

⁶ Nane afe mei cuena daide:

—Ja ñue ícoímo finócaza. Cue bie naga ráfuiaina nai cómuiñenia uícodo itímiedícue. Daje izói dáamiedícue fuillínomo itímiedícue. Abecedario A-mona táinia izóidímiedícue. Daje izói abecedario Z-mo fuizajilla izóidímiedícue. Jáinoína jiróacadímie ñúejina jirótaja izói, afe izói ñúefuiái dibénemo íacadímie mo raiñoñoeno afémiemo zíñoína illáfuena ífireitícue.

⁷ Fiénidena anáfenodímie nana bíena feci raa fia máíñua izói, máíñoite. Afe llezica afémie Juzíñamuitícue, íemo daje llezica afémie cue jitóite.

⁸ Mei íadi nana ínoñedino dibéfodo duere zefuille afémacimo dúide. Uáfueza, ñúefuena jacíruitino daje izói ínoñedino, íemo jiáimana éoidino, íemo jiáimana titádino, íemo jiái jiruífuena finófredino, íemo jiáima fue gáiana fibídino, íemo jiái jánaraimo caimáaidino, íemo nana táinona úritino; nana bie izóidino boode jóraimo dotárediaíoi. Afe jorai iere uzire boode. Afe bie boode jorai íiraie tíllana mameide, mei aféno mo

dotácano jaca ninomo Juzíñamuimona oni eneno duere finócanona íitiaioíza.

Comue Jerusalén

⁹ Afe mei siete dígade ángeles dainámaci Juzíñamui abi imácimona daa cuemo úrizaibite. Afémie nawi Juzíñamui ocuica siete dígade íraie jacírede duere finuana oruide ichecoí uitímie. Afémie cuena daide:

—Ero, Cordero ai izóidena jáitinona o ácataitícue, —daide.

¹⁰ Iemo Juzíñamui Ñuera Joreño bie izóidena nícaí anado cuena cíotate. Afe Juzíñamui abi ímie áillue caifónedumo cue uite. Afénomo monámona Juzíñamui uícomona ana bite jamánomo ñuera Jerusalén jofue cuemo ácatate.

¹¹ Juzíñamui abi ebire quenírena izóí afe jofue quenírie cíoide. Daje izóí iere ráifide nofíci quenírena izóí queníriede. ‘Jaspe’ daina nofíci vidrio enéfecomo cíoina izóí cíoide.

¹² Afe jofue jinófenedo nágafene áillue cirínuabairo raa ite. Afe cirínogamo doce dígabe naze ite. Iemo illa díga nazemo Juzíñamui abi ímie naidaina. Iemo afe náziaimo doce dígade Israel nairai mámeciaí cúeina.

¹³ Afe jofue náziaimona, fuirífenemo dazeámani ite. Iemo jáíie dazeámani onífenemo ite; íemo jáíie dazeámani féifenemo ite; íemo jáíie dazeámani afáifenemo ite.

¹⁴ Afe jofue jinófene cirínua anamo nofíci finoina mozóidibani doce dígade. Illa dígabanimó Cordero nágagobiaimo orécano ‘apóstoles’ dainámaci mámeciaí cúeina.

15 Afe cue diga úrite Juzíñamui abi ímie, oro finoína facáradozi llíide, afe jofue facállena. Daje izói ie náziai facállena, íemo jíái afe jinófene cirínua facállena.

16 Afe jofue fueda nagaámariede; nágafene daje dinóriede. Ie árrera dibene daje dinóriede; íemo ie ruica dibene daje dinóriede. Afe Juzíñamui abi ímie ie llíiga radózido jofue facade. Facádemo dos mil doscientos kilómetros árrera. Daje izói ruica diné eróicana dos mil doscientos kilómetros. Iemo caifo diné eróicana jíái daje izói dos mil doscientos kilómetros. Nágafeníai daje dinóriede.

17 Afe mei jinófene cirínuabani facade. Facádemo sesenta y cuatro metros caifo ite. Afena Juzíñamui abi ímie come facáfírena izói facade.

18 Afe jinófene cirínuabani ‘jaspe’ daina nofíci finoína. Afe jofue íáinide oro niina. Ñue enéfecomo cíoiide vídriona eroide.

19 Jinófene cirínua anamo mozíoidibani nana jíáiforiède ráifide nofíciáido ebire ñue finoína. Nanóidibani ‘jaspe’ daina nofíci ebire ñue finoína, íemo jíáibani ‘zafiro’ daina nofíci ebire ñue finoína, íemo jíáibani ‘ágata’ daina nofíci ebire ñue finoína, íemo jíáibani ‘esmeralda’ daina nofíci ebire ñue finoína,

20 íemo jíáibani ‘ónice’ daina nofíci ebire ñue finoína, íemo jíáibani ‘cornalina’ daina nofíci ebire ñue finoína, íemo jíáibani ‘crisólito’ daina nofíci ebire ñue finoína, íemo jíáibani ‘berilo’ daina nofíci ebire ñue finoína, íemo jíáibani ‘topacio’ daina nofíci ebire ñue finoína, íemo jíáibani

'crisoprasa' daina noñicido ebire ñue finoca, íemo jiáibani 'jacinto' daina noñicido ebire ñue finoca, íemo jiáibani 'amatista' daina noñicido ebire ñue finoca.

²¹ Afe doce dígade naze ibáirabici áillue perla. Illa dígaze daa perla ie finoina. Afe jofue cígido joide áillue macárao íáinide oro finoina. Afe macárao enéfeomo ñue cioide vídriona eroide.

²² Afe jofue eromo Juzíñamuimo gairíraco jaca ninó daa cíñedicue; mei jamánomo ríinorede Juzíñamuimo ebena nágafeniamo caimátaidiaioiza. Afémiena jiáifodo daina cai Ocuíraima. (Afe jofue gairíraco Juzíñamui abiza. Daje izói jiái Cordero abiza.)

²³ Afe jofue jitómado egáíñuamo dúiñede; daje izói fiuido egáíñonide. Mei afe jofue Juzíñamui abímo ite ebírede quenírededo egáíñogaza. Daje izói jiái Juzíñamui Cordero afe jofue egáíñogaza.

²⁴ Nana jíllotaga nairai afe jofue egáñuado mácaitiaioi. Bínie nairai illaini afe jófueo íaioimo ite aillo ebíriede illaíma daíllena ráaniaina átiitiaioi. Atiano Juzíñamuimo, íemo jiái Crístomo izájitiaioi. Daje llezica afe jofue ocuídime íaillinoimo aillo ñúefuena mámeitiaioi.

²⁵ Afe jofue naze jaca monari íbaiñelle. Iemo afénomo jaca mona náuiñeite. Jira náziai íbáillirui íñeite.

²⁶ Enie náiraiai íaioimo ite ebíriede ráaniaina afénomo átiitiaioi. Daje izói afénomo aillo ñúefuai mámeitiaioi.

²⁷ Mei íadi comécina íáiredino jaca afénomo jofu jáinide. Daje izói comécina éoidino dinomo jofu jáinide, naa taino llotínori. Dama zíñona íitino

mámeci cueránicomo mámecina ciegámaci dani afénomo jofo jaille. Afénico Cordero daina Jesucrístomo ite.

22

¹ Afe mei Juziñamui abí ímie íáinide imánina cue ácatate. Afémani jainoi cómena ziiñona cáatate. Afeji vidrio enéfenemo uáfori cioina izói cíoide. Afe imani Juziñamui illáimana ráiiranomona tote. Afe ráiirano daje izói Cordero ie.

² Afe jofue cigido áillue macárao illa. Afe macárao dáafenedo comínina ziiñona cáatate aménaiai riina. Daje izói afénomo ite imani fuédado nágafene daje ie aménaiai riina. Afe aménaiai illa diga fiui llizífiredede. Iemo jái afe aménaiai íbiai nairai ñue manóllena ite.

³ Aféruillaído afénomo faidórafuena jae íñeite. Juziñamui illáimana ráiirano afe jófuemo ite; daje izói Cordero ráiirano afénomo ite. Ie ocuífíregano daa afémiemo caimátaitiaioi.

⁴ Afe llezica afémaci Juziñamuimo, meáiruiñeno jofo conímamo éroitiaioi. Afémaci ozócimo afémie mámecei cúeina.

⁵ Afénomo mona jaca náuiñeite. Afénomo itino mechera izoide egáíñuana jítaiñeitiaioi. Daje izói jítoma egáíñuana jítaiñeitiaioi, mei cai Ocuide Juziñamui íaioina egáioite. Iemo afémaci jaca ninomo ziiñona illáimaitiaioi.

Jesucristo billirui ja ánozide

⁶ Afe méifomo Juziñamui abí ímie nane cuena daide:

—Bie uai iere ua uaiza. Daje izói bie uai iere ínofíregaza. Afe cai Ocuíraíma nauí Juziñamui uai

jino llóraini comécimo úritimie. Afémie birui ie abi ímie orede, ie ocuícamacimo raire cómuitifuiaina onótallena, —daide.

⁷ Iemo Jesucristo daide:

—¡Raire biticue! Binícomo cuega Juzíñamui uáillaina jíruitimie caimare ite, —daide.

⁸ Cue Juáadicue. Bífuiaina cacádicue, daje izói bífuiaina ciódicue. Bífuiaina cacáillano, íemo daje izói cue ciona méifomo, cuemo ácatate Juzíñamui abi ímie anamo dújudicue afémiemo caimátaillena.

⁹ Mei íadi afémie cuena daide:

—Jadie izói cuemo iñeno. O izói Juzíñamui ocuícamedicue. Daje izói Juzíñamui dibénedo úrifirede o ámatiaí izóidicue. Iemo jáí binícomo cuega uáillaina náfuetino izóidicue. Cuemo caimátaíñeno; dama Juzíñamuimo caimátaífireiri, —daide.

¹⁰ Nane dáanomo cuena daide:

—Binícomo cuega Juzíñamui uaina báinino o comécimo jóoneñeno o iri. Mei bífuiái ícoimo ñue fuizájillirui ja ánozideza.

¹¹ Nai bie fuiñena llezica, fiénidimaci íaioi finófirega fiénidifuena dama íaioi finócaza. Fia eroi, mei afe izói íaioi íllado jamánomo duere finólliaioiza. Daje izói comécina íáiredino dama comécina íáireoicaideza. Fia eroi, mei áfedo duere finólliaioiza. Mei íadi ñue itino íaioi illa baimo ñue iri. Daje izói Juzíñamui íena ñue finócamie fáicanocaiñeno afémie íena ífireiri, —daide.

¹² Iemo Jesucristo daide:

—Jii, raire biticue. Illa dígamie mo cue fecalle fia jíridoga izoide raa atídicue. Illa dígamie mo afémie finoca dieze fécaiticue.

¹³ Nanóidimiedicue. Iemo jiái firaimiedicue. Daje izói naga ráfuiái uícodo itímiedicue. Daje izói fuizájillanomo itímiedicue. Iemo jiái abecedario Amona táinia izóidimiedicue. Daje izói abecedario Z-mo fuizájilla izóidimiedicue.

¹⁴ Iaiói iníroina jocófiredino izói, comeci ifue ñuérana méidotino caimare itíaiói. Ímona cáatate amena llizállana güirediaíoi. Afe bie izói daiacade zíiñona íaiói íllena. Daje izói íaiói iniroi ñue jócuamona, afe jofue nazedo Juzíñamui illánomo jofó jáirediaíoi.

¹⁵ Mei íadi comécina íáiredino afénomo jofó jáinidiaíoi. Iemo daje izói jiáima fue gáiana fibídino, íemo daje izói nana jiáiforiede jiruifue finódino, daje izói cómena méinetino, daje izói jánaraimo caimátaidino, daje izói jiáie comínina iere jífuefiredino, naa afe izoide fibídinori; nana bie izoide comini afe jófuego jofó jáinidiaíoi; jáiñeno jino fiébitiaíoi.

¹⁶ Cue Jesúsicue. Juzíñamuimo ua jaináidinomo nana bífuiái jino llóllena cue abi ímie ja cue oreca. Jaiái illaíma David comuilla moi ímiedicue; daje izói afémiemona jebuídino comuítagamiedicue. Iemo iere egáiñote monáiracudu izóidimiedicue, —daide.

¹⁷ Iemona Juzíñamui Ñuera Joreño daide:

—Mai bi, —daide.

Daje izói Cordero ai daína afémiemo ua jaináidinomo íena daide:

—Mai bi, —daide.

Daje izói bíuallaina cacáidino afémiena:

—Mai bi, —omoi daíri.

Iemo Cristo daide:

—Jiróacaitimie ziiñona cáataite jáinoina íbáñeno mai fia júruaibiri. Afe bie izói daiíacade ziiñona illáfuenta óiacadimie mai cuemo bi; raiñóñeno omo fécaíticueza.

¹⁸ Nana binícomo cuega Juziñamui uaimo cacáreidinona bie izói llétaiticueza, cacai: Dáamie bie ráfuenta baímo zotáadi, Juziñamui binícomo cuega jacírede duere finuaniaina afémiemo jóoneite.

¹⁹ Daje izói binícomo cuega Juziñamui uáimona dáamie daa uai oni óiadi, Juziñamui afe ziiñona cáaitino mámeçi cuiánícomo cuega afémie mámeçina oni óite. Daje izói binícomo lloga nífuende jófuemo Juziñamui afémiena jofo jáitañeite.

²⁰ Bifue jino llotímie nane dáanomo llote:

—Jii, raíre biticue, —daide.

Afemona Juan daide:

—Aquíe izóideza. ¡Cai Ocuíraíma Jesús, mai bi!

²¹ Cai Ocuíraíma Jesucristo nana ómoína ñue fínoiteza. Daiítadeza. Jae níie.

Juziñamui Ñuera Uai
New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022

740f11a2-2e26-57f5-a3a7-5deb2d20bd24